

منهزلة عائلية

مسرحية من أربعة فصول

جمعية محمد جمعة



الهيئة العامة للكتاب

١٩٨٧

الخراج الفني : محمد قطب

الأشخاص

أفراد العائلة :

الأب : فى حوالى الثامنة والخمسين ، يعانى المرض فى عينيه .
والشيخوخة المبكرة .

الأم : فى حوالى الخمسين تعاني آلام الروماتيزم .

هند : الابنة الكبرى متزوجة .

أمينة : الابنة الوسطى .

علا : الابنة الصغرى .

منير : الابن الأكبر « متزوج » .

حسين : الابن الاوسط (الثانى) متزوج .

صابر : لابن الاوسط (الثالث) أعزب .

عمر : الابن الأصغر (الرابع) متزوج .

حسان : زوج هند .

ليل : زوجة حسين .

هدى : زوجة عمرو .

ماهر : طفل حسان وهند .

سالم : شقيق الأب الأصغر .

هلال : شقيق الأب الأكبر .

كرم : فى حوالى الثلاثين يتقدم لخطبة علا .

الفصل الأول

« المنظر »

(فى مؤخرة المسرح باب للمنور يتوسط الصالة ، والى اليمين بابان يؤديان الى حجرتى النوم ، والى اليسار ثلاثة أبواب ، باب الشقة وباب حجرة الطعام ، وباب يؤدى الى منافع الشقة .. يشغل الصالة كنبة بلدى ، وكنبة أنثريه وأربعة كراسى فوتيه ، بالإضافة الى كرسيين من الخيزان ، ومنضدة صغيرة فى الوسط ، الستائر تغطى كافة الأبواب ، بعض صور افراد الأسرة معلقة على الجدار الخلفى ، الوقت صباح أحد الأيام) .

صوت من الخارج : بريد ، بوسطه ، بريد

(ثم جرس الباب ينفق)

أمينة : (تخرج من حجرة النوم وتنتجه لباب الشقة ، تفتحه ، حاضره .. تستلم الخطاب وتعود الى مقعد تجلس عليه) .

الأب : (يأتى صوته من حجرة أخرى) مين يا أمينة ؟

أمينة : البوسطجى يا بابا .. جواب من منير .

الأب : (صوته يقترب حتى يظهر) عملتى الشاى يا أمينة .

أمينة : (تنهض ، تناوله الخطاب) لسه يا بابا .. (وهى تنتجه نحو الطرقة المؤدية الى المطبخ) بسرعة ح يكون جاهز ..

الأب : يجلس مكان أمينة وهو يفيض الخطاب (حطى الشمسى
ع النار وتعالى اقربى لى الجواب ..

أمينة : (يأتى صوتها من المطبخ) حاضر .. أنا جايه حالا ..
الأب : (يحاول قراءة الخطاب ، يخلع النظارة ، يبيدها ثانية)
يعنى يا ابنى ، كان لازم الشحططه دى ، ما هو رب هنا رب
هناك ، ورزق هنا رزق هناك ..

أمينة : (تعود) أنا جيت يا بابا (تتناول منه الخطاب ، تقرأ وهى
واقفه) والدى العزيز ، والدتى المحبوبة ، أنا بخير والحمد
لله ، أخبركم بأننى سأعود فى الأسبوع القادم ان شاء الله ،
لا تكلفوا أنفسكم أى مشقة لاستقبالى ، سلامى الى ..
(تتوقف) أما اشوف الشاى .. (تجرى نحو المطبخ) ..

الأب : أحمدك يارب ، لى نصيب أشوفه قبل ما يجرى لى حاجة ..
أمينة : (وهى عائده) بعد الشر يا بابا ..

الأب : علا نزلت امتى ؟

أمينة : من بدرى .. اقرأ بقية الجواب ..

الأب : كفايه ، المهم عرفته وخلّاص .. أمك لسه زايمة ..

أمينة : أيوه .. أصحيتها .. ح أجيب الشاى (تضع الخطاب فى
المظروف وتضعه على منضدة الوسط الصغيرة) ..

الأب : (لنفسه) يا خسارة ، يا ميت خسارة يا ولاد ، كل واحد
طفشان فى ناحية ، كل واحد خلع نفسه وعمل له دولة
لوحدته ، كل واحد بقى كبير وماوش كبير ، يعنى لوجرى لى
حاجة ما الأقيش حد جنبى ..

أمينة : (وهى تعود بالصنية) كفاية أنا وعلا جنبك يا بابا ..

الأب : وانتى ح تعمل أيه يا بنتى ..

أمينة : ايه بس الى انت عايزه وأنا أعمله لك ..

الأب : لا يا بنتى ، ولا حاجة ..

(تخرج الأم من حجرة النوم ، تتشأب ، تقترب من مقعد ، تستند الى مسنده ثم تجلس) .

الأب : نوم العوافى ..

الأم : الله يعافيك ، رجليه مش قادره أشيلها .

أمينة : أصب لك شاي يا ماما ..

الأم : صبى يا أمينة ..

(تنظر الى الخطاب ، تتناوله) متين الجواب ده ..

الأب : منير جاى الاسبوع ده ..

الأم : (بشوق تقاطعه) والنبى .. ح يوصل امتى ؟ الساعة كام ؟

أمينة : (تنتهى من اعداد كوب الشاي لادهما ، تقدمه اليها)
ما حددش ميعاد وصوله ..

الأم : (فى غضب) أخص عليك يا منير ..

الأب : ما هو عارف ظروفنا ، أنا وعينيه تعبانه ، وعرف العملية
الى عملتها ، وانت عارف ان الروماتيزم رابطك فى البيت .

الأم : أنا لو بازحف على ركبى أروح أقابله ..

أمينة : ومن عارف ، يمكن يحدد الميعاد لحد من اخواته ..

الأب : جازي .. ويمكن حده لنساييه ..
(يدق جرس الباب ، تهرع اليه أمينة ، تفتحه)

علا : (تدخل وترفع يدها اليمنى محيية) سلام ..
الأب : خير ، رجعت ليه ..

الأم : أيه يا علا ؟ انت مارحيتيش الجامعة ..

علا : يدوب .. زرت السكة ورجعت ، (تجلس وتخلع حذاءها
تمدد ساقها امامها على الأرض) ربنا يتوب علينا من
المواصلات ..

الأب : رجعتي ليه يا هانم ..

علا : الجامعة قافله النهاردة ..

الأم : هيه الجامعة عمرها بتقفل يا علا ..

أمينة : لازم فيه حاجة ..

علا : (تهر رأسها) أبوه ، فيه مظاهرات يا ستى .. الطلبة
واقفين فى ناحية ، والبوليس فى الناحية الثانية .. تحبوا
يعنى انى

الأب : (مقاطعا) الحمد لله انك رجعت قبل الطلبة ما يهيجوا ..

علا : دنا دخت يا ماما لحد ما لقيت أتوبيس ركبتنه ، كل المواصلات
متحولت بعيلم عن مكان المظاهرة ، وحاجه آخر لحبطه ..

الأم : ربنا يستر ، أنا عارفه بيتظاهروا على ايه ، ما يعيشوا زى
ما الناس عايشة ..

علا : أيه ده (تخطف الخطاب من يد أمها) منين الجواب ده ؟

أمينة : من منير ..

الأم : يا بنت استنى لما أقرأه ..
علا : أقرأه أنا الأول .. والنبي يا أمينة تحضري لقمه أكلها ..
أمينة : قومي حضري لنفسك ..
علا : (عين على الخطاب وعين على أمينة) أنا تعبانة قوى يا حبيبتي ..
 يا ريتنى مستريحه زيك ..
أمينة : بكرة تبقى زبي وتستريحى ..
علا : (بميوعة) أنا .. وحياتك ، الوظيفة مستنياني .. استام
 الشهادة بايد ، وقرار التعيين بالأيد الثانية ..
الآب : ليه .. أبوك كان وزير ، والا حد من اخواتك من المحاسب ..
علا : لا (تشير الى رأسها) هنا فيه مخ .. مش زلاييه ..
 يا ترى منير حبيبي جايب لى آيه معاه .. (تضع الخطاب على
 المنضدة) ..
الأم : أنا لو منه ولا أعيرك ..
علا : يا ماما حرام عليك ، دنا غلبانه قوى ..
أمينة : (تحسبها بنظرات متوعدة) قوى ، بكرة نشوف ح يعمل
 فيك آيه ..
علا : ح يعمل فيه آيه ؟
أمينة : انت عارفه وأنا عارفه ..
الآب : (كمن يتنبه) فيه آيه يا بنات ، آيه يا أمينة ، تعرفى حاجة
 احنا ما نعرفهاش ..
أمينة : أبدا يا بابا ..
علا : (فى غضب) عاجبك كده .. (تقف فى غضب) ..
الآب : (غاضبا) اقعدى يا بنت ، هه يا أمينة .. فيه آيه ؟

أمانة : (تبسم) قصدي يا بابا ، قصدي ..

الأم : انطلقى يا بنت ..

أمانة : قصدي انه ح يرجعها لأصلها ، ح يرجع وشها لطبيعتها ،
ح يخليها تقص ضواقرها ، ويعمل لها نظام تمشى عليه ..
ما انتم عارفين منير ما يعرفش الدلع ..

علا : (تقف خائف أمها) بزمتك أنا ادلعت عليك يا ماما ..

الأم : الحقيقة ، الحقيقة ..

علا : (تقف خلف أبيها) بزمتك أنا ادلعت يا بابا ..

الآب : مش ده أصل الموضوع .. أصل الموضوع ان البيت
ما فيهوش راجل داخل .. خارج ..

الأم : البركة فيك يا أبر منير ..

أمانة : وانت رحت فين يا بابا ..

الآب : أنا يا بنتى موجود ومش موجود ، صحتى على قدى ، ونظري
يا دوب هه ، و ...

الأم : حسك فى الدنيا ..

علا : (تضع يدها على بطنها) عايزه أكل ..

أمانة : الأكل عندك فى المطبخ ..

علا : (قرب باب الردهه) جدح ياكل معايا ..

الأم والآب : (معا) مالناش نفس ..

أمانة : ولا أنا ..

علا : (تعود وتتوسط الصلاة) يا سلام لو يجيب معا عربيه ،
ويسلفها لى لفاية ما أخلص الجامعة ..

الأب : (ينهض) يا ولاد عيشوا على قدامكم .. (يتجه إلى حجرته)
علا : بلاش نحلم يا بابا .. أهو كلام ، هو الكلام عليه جمرك ..
الأب : (يقف قرب الباب) لا ، عليه خراب الدماغ .. مش كفايه
اخواتك دماغنهم خربت .. عمرو افندى مش عارف راسه
من رجليه ، وحسين بيه عمال يجرى يمين وشمال على السفر ،
حتى حسان الي بنقول انه عاقل .. جات له هفه ومش عايز
يعيش فى الشقة بعد ما رجليه خفيت عليهما .. أنا مش
عارف إيه الى جرى فى الدنيا ، الكل مسروع ، الكل بيعجرى ،
زى ما يكون كل واحد راكمه شيطان ..

أمينة : كله كوم ، وحكاية عمرو كوم ..

الأم : انت لازم تفكرنا بالهم والغم ..

الأب : وهما سابوني لحظة ، نفسى أهوت واستريح ..

الأم : لو ربنا عايزك مش ح يسببك ..

الأب : تلى رايبك ، ربنا عايزنى أشوف المهزلة الى احنا عايشنهما ..

الأم : (لأمينة) ودى له كرسى فى البلكونة عشان يستريح ..

الأب : ما تتعبوش نفسكم ، الكرسى هناك .. (يهدف إلى الحجره) ..

الأم : (لينتقيا) من يوم ما اتعود قعاد البلكونه وهو مش على
بعضه ..

أمينة : معذور يا ماما بابا ما كانش يقعد فى البيت الا الشديدي
القوى ..

الأب : (يأتى صوته من الحجره) يا أمينة ، هات يا بنتى القطره
بتاعتنى ..

أمينة : حاضر يا بابا (تهرع إليه)

الأم : شفتى يا علا ، أخوك مش عايزنا نقايله فى المطار .. ده كان
كل مرة بيعت اليوم والساعة .. إيه جرى المره دى ..

علا : يمكن ينزل على أسيوط ..
الأم : (تشهق) أسيوط ..
علا : ضروري مراته ح تقابله فى المطار ..
الأم : حقه يا منير لو عملتها ؟ ..
(يلقى جرس الباب .. تهرع علا وتفتحه)
علا : أهلا يا عمرو ..
عمرو : (يدخل ويده حقيبة سفر ، يضعها الى جوار الباب .
يصافح أمه وأميئة) ازيكم ..
الأم : ازيك انت وازى الولاد ..
عمرو : الحمد لله .. فين بابا آمال ..
أميئة : فى البلكونه .
علا : فين يا ابنى .. انت كنت مسافر .. والا آيه .
الأم : بقى ما تجيش تظمننا ، عملت آيه ؟
عمرو : (يبتسّم على وجهه التأثر) العمل عمل ربنا ..
أميئة : يعنى ما فيش حل ..
عمرو : وزاد وغطى ، صاحب البيت طالب أفضى له الشقة .. محنار
يا ماما .. مش عارف أعمل آيه ..
الأب : (يدخل وفى غضب) حد يعمل العيله المهيبه الى انت
عملتها دى .. حد فى الزمن ده بيتنازل عن شقته !!
عمرو : أرجوك يا بابا .. أرجوك
الأب : ما هى أرجوك دى الى وديتكم فى داهيه (يقلد ابنه فى
سخريه أرجوك يا بابا .. أنا عارف مصلحتى كويس ..

أرجوك يا بابا سميني في حالي .. أرجوك .. وأدى آخرتها
نشيل همك فوق دماغنا صغيرين وكبار .. لو الأب مننا
يطاوعه قلبه ، لو قلبى يطاوعنى أقول لك أنا أرجوك يا ابنى
ما تحكى لنا مشاكلك ، وحلها بإيدك ..

عمرو : أنا ما طلبتش معونه من حد ..

الأب : وبيتك الى خرب ..

عمرو : ما خربش ولا حاجة ..

الأب : طيب قول لى أيه العمل .. الشقة الجديدة واتنصب عليك
فيها .. والقديمة وأديك اتنازلت عنها .. ح تقعد بولادك
فى الشارع ..

عمرو : أقعد مطرح ما أقعد .. (يدفن وجهه بين كفيه ، ينهه
بالبكاء) ..

الأب : (متأثرا) يا ابنى مش قصدى أزعلك .. أمينة .. اعملى
لاخوك شأى .. (ينصرف من حيث جاء) ..

الأم : اعملى له لمون يروق دمه ..

أمينة : حاضر (تتجه الى المطبخ) ..

الأم : ما تزعلش من أبوك يا عمرو ، أبوك حامل همك وهم ولادك
ومش قادر يعمل حاجة ..

عمرو : (يرفع رأسه ويجفف دموعه) أنا مش زعلان ، بس يراعى ،
أنا مش مستحمل نفسى ..

علا : هدى أعصابك ، اسبح بون .. وفوت من التانيه ..

أمينة : (تعود وتقدم له الليمون) اشرب يا عمرو ، هدى أعصابك ..

عمرو : ما بقاش فيه أعصاب عشان تهدى ، أنا أعصابى انتهت خلاص ..

الأم : الدنيا ما اتهدتش يا عمرو ، كل مشكله ولها حل ..

عمرو : الا مشكلتى يا ماما .. ضبعت وضاع شقا عمرى ..

الأم : ليه يا ابنى ، هيه البلد فوضى ، فيه قانون وفيه محاكم ..

عمرو : وفيه موت يا حمار ..

علا : (تضحك ، ينظرون اليها جميعا فتكف) حلوه موت يا حمار دى ..

أمينة : ارفع قضية مستعجلة ..

عمرو : ما هو ده الى أنا عملته .. بس نجيبه مئين ، فص ملح وداب ..

علا : أمه موجوده ..

عمرو : أمه قالت فى النيابة ابنى نصاب ، أعمل له آيه .. حاكمه ..

ودفعوه الى خده من الناس ، انما العمارة عمارتى ، أسكنها

زى ما أنا عاوزه ..

أمينة : مش ده المهم دالوقتى ، المهم ح تعيشوا ازاي ؟ وفين ؟

عمرو : عدى ح تقعد عند امها ومعاهم الولاد ..

الأم : وانت ؟

عمرو : (وبعد تردد) أنا ح أشوف اى لوكاندة رخيصة أقعد فيها ..

.. ما فيش قدامى غير كده ..

الأم : (تخط صدرها) لوكانده ، لوكانده وبيت أبوك مفتوح ..

عمرو : أذك شفت مقابلته ليه ازاي ..

الأم : ولو .. اذا ما كانش بيت أبوك يساعك ..

عمرو : (يقطعها) بابا مش عاوز يشوف وشى ..
علا : اهتياك ..
أمينة : ده الود وده تقعدوا كلكم هنا ..
الأم : العين بصيره ، والايده قصيره ..
عمرو : المهم دلوقتى يا ماما ..
الأم : المهم واسمع كلامى كويس ، سيبك من حكاية اللوكانده
 دى .. أدبك تقعد معانا لغاية ماربنا يحلها .. وأهو سرير
 عمك هلال فاضى ، تقدر تنام فيه ..
عمرو : بس يا ماما ..
علا : ح تبسبس ليه ، هيه ماهيتك حمل أجرة اللوكانده ..
الأم : دخل شنطة أخوك يا علا ..
 (تنهض وتأخذ الحقيبة وتدخلها حجرة الأب)
عمرو : بس مش ده المهم يا ماما ..
الأم : هو فيه أهم من الحته الى تريخ جنبك فيها ..
عمرو : بعد اذنك يا ماما .. أنا عارف انه طلب سخيف بس
 ما فيش حل ..
الأم : اطلب يا حبيبى .. عايز ايه ..
عمرو : الصالون بتاعى ، بعد اذنك يعنى حا أجيبه هنا ..
الأم : هنا .. ح نعطه فين يا عمرو ..
عمرو : ما فيش مشكلة .. أنا ح أرصه فوق الدولا .. هه موافقه
 يا ماما .. دى حاجة بسيطة ، بقيت العفش عند ماميت هدى ..
الأم : الى تشوفه يا ابنى .. الى تشوفه ..
علا : خلاص ، يا سيدى ، فك تكشيرتك دى بقى .. آل لوكانده
 آل

الأب : (يعود ويقف بباب الهجرة) شنطة مين دى ..
الأم : دى شنطة عمرو .. ح يقعد عندنا كام يوم كده ..
الأب : يقعد ..
الأم : مش ح يضايقك فى حاجة ، يدوب يحط جنبه ساعات الليل ..
الأب : يحط ..
الأم : وأعو سرير عمه فاضى ..
الأب : مبسوطين كده ، يعنى لو سمعتوا كلامى ، ووقفوا جنب بعضكم ، واشترتوا لكم حنة أرض ، يعنى عاجبكم البعزة دى ، كل واحد فى ناحية ، لكن لا .. زى ما يكون كلامى ح يضركم ..
الأم : جرى ايه يا أبو منير ، العايط فى الفايث ..
الأب : (يقطعها) عارف ياستى ، نقصان من العقل . لكن أنا عيطت قبل ما يبقى فايث فاكرو .. يوم بسلامته ما قال انه ح يدفع خمستلاف جنبه مقدم شقه .. فاكرو يوميا قلت له ايه ..
الأم : معلش ، أهو خد درس ما يتنسيش طول العمر ..
عمرو : خلاص يا بابا .. خلاص ، أوعدك بعد كده آخذ رأيك فى كل حاجة ..
الأب : بعد أيه ، بعد خراب مالطه ..
امينة : (تضحك) مالطه ما خربتش يا بابا ..
علا : (تضحك هى الأخرى) تلاقيه ولا يعرف حتى مكانها فين ،

الاب : (في غضب) اضحكي يا اختي اضحكي ، ليه لا ، ما هو
أنا علمتكم عشان تضحكوا على جهلى .. كل حته فيها عقول
مصدية تبقى خراب ، كل بيت عياله يفتكروا نفسهم كبروا
يبقى خراب .. اضحكي ياست علا ..

الام : خلاص يا أبو منير ..

الاب : (يشيح بيديه) بلا منير بلا قرف (يعود من حيث جاء) ..

عمرو : انت غلطانة يا علا ..

علا : هو اللي يقول الحق يبقى غلطان .. بابا يعرف مالطه فين ..

الام : بس يا بنت ، قومي شوفى وراك ايه ..

عمر : الأول اعتذرى لبابا يا علا ..

علا : (تغير الموضوع) ما عرفتش يا عمرو ، منير بعث انه راجع ..

عمرو : صحيح ..

علا : (تتناول الخطاب وتقدمه اليه) الجواب أهه .. (وهى تنجه

الى المطبخ) حد ياكل معايا ..

عمرو : (وهو يفض الخطاب) ما قالش يوم ايه ..

الام : أبدا (بصوت مرتفع لعلا) اءلى حساب اخوك معاك

عمرو : لا ، ما ليش نفس ..

الام : كل لك لقمة مع أختك ، تلاقيك على لحم بطنك ..

عمرو : (ينتهى من الخطاب ويضعه على المنضدة ، بغيط) آه لو

أشوفه ، كنت أشرب من دمه ..

الام : (وهى تقف بمشقة - بغضب) دم مين يا وله ..

عمرو : دم النصاب يا ماما ..

الام : آه ..

عمرو : اساعذك يا ماما .
 الأم : خلاص وقفت (وهى تتجه نحو حجرة الأب) أما أروح أهدي
 أبوك ، تلاقينه عمال ياكل فى نفسه ..
 (تضع علا صنييه الطعام على المنضدة)
 علا : (تجلس) عمرو ، مد ايدك باسم الله ..
 عمرو : والله مالى نفس ..
 علا : معايا ح تفتيح نفسك ، كل يا شيخ ، شوف يا ابنى ..
 عمرو : بنت ..
 علا : المدة ذنبيها ايه ، مسيرك ح تاكل مهما كانت المشاكل ..
 دى الناس بتبقى راجعه من دفن الميت ويقعدوا ياكلوا ..
 وتشوفهم ساعة الجنازة تقول دول ح يصوموا لحد ما يموتوا ..
 أمينة : (تنظر اليها فى قرف) كلامك يسد النفس ..
 علا : (وهى تأكل) بالعكس ، ده يثبت ان ما فيش حاجة فى
 الدنيا تستاهل ..
 عمرو : (يشاركها الاكل ببطء) بكره نشوف ونتفرج ..
 علا : هوه انا زيكم .. انا حاسبها من دلوقتي ..
 عمرو : اختك حسبتها قبلك ..
 علا : لا .. هند كانت عايزة تتجوز وخلاص ، اتساهلت فى حاجات
 كثير .. واتنازلت عن حاجات كثير .. رضيت بالغلب زى
 ما بيقلوا ..
 أمينة : المهم بقالها بيت .. وولاد ..
 علا : بيت (تضحك) أوده فوق السطوح بتسميها بيت ..
 أمينة : بكره ترجع شقتها أما تخشها الميه ..

علا : أنا لو منها .. أدق طرمبه ..
عمرو : ومشكلة الأولاد ، طول ما هي جنب حمايتها مستريحه ..
علا : مش مشكلة تدخلهم حضانة .
أمينة : ما فيش جنب شقتها حضانة .
علا : تاجر لهم شغالة تقعد معاهم ..
عمرو : (هازئا) شغالة .. ده طلب ميت موظف أسهل وأرحم
من طلب شغالة ..
علا : ما فيش مشكلة ، تقعد من الشغل ..
أمينة : انت اللى بتقولى كده ..
علا : أيوه أنا .. على فكرة أنا بعد ما أخلص مش ح أشتغل ..
عمرو : أهو كلام .. ساعتها لو حد قالك الكلام ده ح ترفضيه ،
وح يبقى عدوك ..
أمينة : سيبك منها ، دى مالهاش كلمة ..
علا : أنا ماليش كلمة ..
أمينة : أيوه ، أفكر .. لسه من شويه قايله استلم الشهادة بايد
وبالتانيه قرار الوظيفة ..
علا : ده لو أنا عايزه الوظيفة ..
عمرو : تيجي ازاي دى ..
علا : آه والله ، دنا معروض عليه وظيفة من دلوقتي .. بس أنا
رفضت ..
أمينة : طيب ما تشغليني أنا .
علا : أفكر .. بس مين ح يقعد مع بابا وماما .. مين ح ..
با أقول ايه .. استنى القوى العاملة أحسن ..

أمينة : مش با أقولك بتاعة كلام و بس ..
(يدق جرس الباب ، تقوم اليه أمينة ، بينما تدخل الأم)
الأم : افتحي لأخوك حسين ..
(يدخل حسين ويبدو منثرجا)
حسين : (يضافهم) باركوا لي ، خلاص لقيت عقد ، خلاص اتجملت
كل مشاكل ..
علا : مبروك يا حسين ..
عمرو : علي فين ان شاء الله ..
حسين : بلد عربي .. (يجلس) أما أنا مبسوط بشكل ..
ما تتصوريش يا ماما .. سعادتني قد ايه ..
الأم : (وهي تجلس) ربنا يسعدك كمان و كمان ..
حسين : المهم دلوقتي ، كل واحد يرمي بياضه ..
علا : يرمي ايه يا أخويا ..
حسين : يرمي بياضه ، محتاج قرشين كده ، حسبة ألف جنيه ..
أمينة وعلا والأم : (معا) ألف ايه ؟
حسين : اتخضيتوا ليه ، ألف جنيه ..
الأم : بأقول لكم ايه ؟
الجميع : ايه ؟؟؟
الأم : غطوا عليه وصوتوا .. (تلقي بظهرها الى الوراء ، تسقط
ذراعها)
الجميع : (يحيطون بها) ماما .. ماما .. ماما ..

« ستار »

الفصل الثاني

(نفس المكان ، بعد أسبوع من أحداث الفصل الأول الوقت صباحا)

الآب : شفتى يا سنى الخلفة الى تفرح .. آل ايه نطلع .. ننزل
لازم ندبره الألف جنيه .. كل يوم يفكرنا ، والثانى
بسلامته ، كل يوم يحول حاجه من عفشه ويجيبها ..
وأخرتها يا أم منير ..

الأم : أهم ولادك ، أنا ح أعمل ايه .. انت الى مربيههم ..

الآب : (يخط صدره) أنا .. أنا يا أم منير الى قلت تربط الحزام
عشان نعلمهم ، أنا الى قلت ناكل عيش حاف ونربيههم
أحسن تربية .. أنا الى ..

الأم : (تقاطعه) كل الناس بتعمل كده ..

الآب : لا .. لا .. اذا كان الناس غلطانين ما كانش يجب اننا
نغلط زيههم .. ومين نعرفه غلط غلطنا ، مين فى العيلة خاب
خيبتنا ..

الأم : أدينا أحسن منهم ، مين فى العيلة علم ولاده زينا .. مين ..

الآب : (يقاطعها) مين قال لك .. بصى حواليك كده ، ولاد أختك
عنايات ، ما حدش منهم دخل الجامعة ، وأهم مبسوطين
والحمد لله ، وأختك ليلى الله يرحمها ، ما لحقتش تربى

ولادها ، أهم صلاة النبي يشرحوا القلب ، كل واحد له بيت وكيان ، وما حدث سمع عنهم الا كل خير ..

الأم : برضه مش زى ولادنا .. المتعلم فيهم واخذ شهادة متوسطة
الأب : نعمه وفضل ، عرفوا ثوبهم ولبسوه ..

الأم : ما حدث فيهم دكتور يا أبو منير ..

الأب : شئ لله يا دكتور .. وعملت له ايه بسلامته ، ارمى فى اسبوط ، استقال ، هج على بره ، عملت له ايه ..

الأم : قيمه ومركز ..

الأب : قولى ضيع عمره هدر ، أربعين سنة عمره ولسه ما خلفش حجة عيل . أنا مش عارف ح يعمل ايه أما يرجع ، لا مشغله ولا مشغله ، الى فى سنه بقوا مديرين ..

الأم : (فى غضب) أهو عملنا الى علينا خلاص ..

الأب : هو عملناه بعقل احنا عملنا الى علينا وعلى أهليتنا وعلى جدودنا ، ما هي كانت هرجه بقى ، وكل الناس افتكرت ان الى يدخل الجامعة يطلع على الوزارة عدل ..
أمال .. قيمه ومركز ..

الأم : انت بتبكتنى على ايه ؟ أهم ولادك طلعلوا فرق والا نزلوا تحت ، انت حر معاهم ..

الأب : بعد ايه . هم بينزلوا تحت بعقل . بسلامته عمرو اتخرج واشتغل ، واتجوز ، وخلف ، وفي الآخر ما لوش بيت يلمه ويلم عياله ، رجع لبيت أبوه زى البنات الى طردها جوزها ..

الأم : نصيبه كده ..

الأب : (بهدوء) لا يا ام منير احنا الى عملنا كده . غلطنا فى المدرسة

أيوه ، المدرسة الى من غير ورقة وكراسة وقلم هيه الاصل .
والى بيذاكروا فيها هم الى بيفلحوا ..
الام : (فى ثورة) شوف الراجل ، يعنى كنت عاوز ايه ، تطلعهم
صناعية ..
الاب : ومالههم الصناعية ..
الام : مش مكفيك صابر ..
الاب : وماله صابر ، زينة الشباب ، عقل ، وفكر وقيمه ..
الام : (ساخرة) ودبلوم صنايع ..
الاب : وماله ، انا نفسى اشتغلت طول عمرى صنايعى ..
الام : آه ، لو فيه تعليم ببلاش على أيامك كنت اتعلمت ..
الاب : أيوه .. أهو التعليم أبو بلاش ده الى جرننا لورا . وبرضه
ما تنسيش انى واخد الابتدائية ..
الام : ابتدائية آل . تسوى ايه فى سوق الشهادات ..
الاب : تسوى كثير .. أيامها كان التعليم تعليم . وكان فيه تربية
قبل التعليم ، والنهارده ، تسوى ايه الدكتوراه ..
الام : لها مركزها برضه ..
الاب : آه .. المراكز ، رخره وديتنا فى داهيه . فلان بقى وكيل
وزارة ، فلان بقى وزير ، فلان بقى .. ، وكله فى الآخر
بيمد ايده ، الى بيملها عشان ياكل . ويلبس ويشرب .
والى بيملها عشان يسرق ، والى بيملها عشان ياخذ
رشوه ..
الام : (مقاطعة) أرجوك كفاية ، فضنا من دى سيرة ، مش عايزين
نكد فى يوم زى ده ..
الاب : ما هو جاي فى السكة ، دلوقتى تشوفى ..

الأم : مين ؟ منير ..
الأب : لا .. الغم والنكد ..
الأم : يا راجل ، أتمنى حاجة عدله .. حد يتمنى الغم والنكد ؟
الأب : ولادك يا هانم الى بينكشوا عليه بابرة ..
أمينة : (تخرج من حجرتها ، تتشأب وتتمطى) ما حدش جه ؟
الأم : زمانهم جابين ..
الأب : اعملى لنا يا بنتى شوية شاي نبل ريقنا الناشف ..
أمينة : حاضر يا بابا .. (تذهب الى المطبخ)
الأب : اعمل ايه يا اخوانى .. البيت ح يرجع معسكر تانى .
(يدور بعينيه فى أرجاء الصالة) ، نقسم الأود ، والصالة .
ونخف رجلينا عن الناس عشان ما حدش يزورنا ..
الأم : يا خويا .. حد فاضى يزور حد الأيام دى ..
الأب : على رأيك ، ده حتى الكل قاطعوننا من زمان ..
الأم : كل واحد بيجرى ورا مصلحته ..
أمينة : (تعود وتضع الشاي ، تجلس) بتكلموا فى ايه ؟
الأم : احنا .. ولا حاجة .. بنفكر فى المشاكل الى حوالينا .
أمينة : مشكلة عمرو طبعاً ، والله ما باين لها حل ..
الأب : والمحروس حسين ، ح نجيب له الألف جنيهه منين ؟
الأم : لو منير ربنا يهديه ..
الأب : ح يديهم له اياك ، وبالمرة يشوف لعمرو شقه ، انت فاكراه
ايه . ح يكبش ويديعم ..
الأم : وفيهسا ايه ، أخوهم برضه ، مش أحسن ما يمدوا ايديهم
للغريب ..

الاب : (يحك ذقنه بيده) انت شايقه كده ..
الام : امال ايه ، ده الصاحب بيقف جنب صاحبه فى الزنقه ،
يقوم الاخ يتخلى عن أخوه ..
الاب : مايتخلش ليه ايه يجبره ..
الام : احساس الاخوة ..
امينة : رابطة الدم والشعور ..
الاب : يا عيني عليه ، يعنى انا ما عنديش دم ، ولا شعور ، (يحدج
أم منير بنظرة حادة) ولا احساس بالاخوة ، أنا الى طول
عمرى عاقل ، انا الى ..
الام : انت ايه ، حد جاب سيرتك فى خير والا شر ، حد داس
لك على طرف ..
الاب : طرف بس ، دا انت دسيتى على جسمى كله ، خلتينى أقف
قدام سالم أخويا زى الى عاملها على روحه ، هو هلال برضه
مش أخويا ؟
الام : (ثائرة) احنا ح نرجع تانى للموضوع ده ، مش قلنا ننسى
وخلص ..
الاب : وده موضوع بيتنسى ، هلال أخويا من لحمى ودهى ما قدرتش
أشيله فى مرضه ..
الام : سالم خده عنده وخلص ، أهى اختى فتحية برضه الى
بتخدمه وأدينا بنزوره ونظمن عليه ..
الاب : لو أقدر ما أزوروش كنت استريجت ، لكن ، فى كل مره ..
نظرتة بتحسسنى انى ولا حاجة .. أبقي عايز أضرب نفسى
بالرصاص ..

أمينة : يمكن الى حصل ده جه فى صالحنا ..

الأب : ازاي يا بنتى .. ازاي نبرر الغلط بانه فى صالحنا ..
الأم : أيوه . يعنى دلوقتى كنا حنعمل ايه ؟ عمرو وأهو رجع
يقعد معانا ، ومنير جاي دلوقتى ، ويمكن مراته تيجى ويقعدوا
لهم يومين ، كنا ح نعمل ايه ؟ نطرد عمرو ، والا نقول رجع
يقعد فى لوكانده .. (تنهته بالبكاء) يعنى كنت غلطت
والا غلطت . ده بيقولوا الى يعوزه البيت ..

الأب : احنا ح ننفتح فى العياط (يقف) عن اذنكم (يذهب الى
حجرته) ..

أمينة : جرى ايه يا ماما ..

الأم : أبوك كل شوية بيكتنى . هوو أنا ناقصه . الى فيه مكفينى
هو الى بيحصل ده هين عليه ..

أمينة : روقى دمك يا ماما .. انت عارفه بابا .. من يوم ما خرج
على المعاش ونفسيته تعبانة ، وما تنسيش تعب عينيه ..

الأم : (تحفف دموعها) وهو الى تعبنا لازم يتعب الى جواليه .

أمينة : معظم الرجالة كده ..

الأم : بس مش بطريقة أبوك ..

أمينة : لا يا ماما .. ده يمكن بابا أهون من غيره ، روقى امال ..
زمان اخواتي جايين ، قصورى منير واحشنى قوى .. كان
نفسى أروح معاهم المطار ..

الأم : كان لازم واحده منكم تكون معانا .. ضيف يطب ، ولا نعوز
حاجة ..

أمينة : أمال لما نتجوز ح تعملوا ايه ؟

الأم : وقتها يحلها ألف حلال . يمكن تكون متنا ..

أمينة : بعد الشر يا ماما .. دنا مش ناويه أسبيككم خالص ..
الأم : بكره ييجى اللى ياخدك مننا ، ساعتها ح تنسينا حتى لو
كنا عضم فى قفه ..
أمينة : (محاولة اضحك أمها) والله ان كان عاجبه يقعد هنا
أهلا وسهلا .. مش عاجبه الله يسهل له ..
الأم : كلام آيه ده ، تبقى مش ناويه تتجوزى ..
أمينة : بالعكس يا ماما ، ألف من يتمنى ..
الأم : (باهتمام) أمينة مخيبه حاجه ..
أمينة : (فى دلال) عموه أنا أقدر يا ماما ..
الأم : وشك بيقول غير كده ..
أمينة : (تنجح فى تغيير الموضوع) الله يا ماما .. انت مش ح
تغيرى هدموك !
الأم : (تنظر الى جنباتها) آه والله يا بنتى ، دش عارفه الجلابية
دى كالمه ليه ؟
أمينة : قومي ياست الكل . قومي غيرى هدموك . (تنهض) على
فكره يا ماما .. مش أفضل برضه لو نزلنا الكراسى الى
فوق الدولاب ، يمكن نحتاجهم ..
الأم : أيوه .. بس انت عارفه الكراسى بتاعة عمرو ، يمكن
يزعل ، ولا مراته تقول حاجة ..
أمينة : مش كفاية ضيقنا على نفسينا .. وفضينا لهم مكان ..
الأم : نزلهم ، ورضيهم عبال ما أغير هدموى ..
(تساعد أمينة أمها فى النهوض ، تذهب الأم الى حجرتها
لتغير ملابسها ، وتدخل أمينة الى حجرتها لتحضر الكراسى ،
وتقوم برصها الى جوار الكراسى الموجودة أصلا)

الأب : (يخرج من حجرتة) ايه ده يا أمينة ، وهيه الصالة ناقصه ؟

أمينة : الاحتياط واجب يا بابا ..

الأب : طيب يابنتى .. ابقى ادينى شوية ميه (يدخل ثانية) .

أمينة : حاضر يا بابا ..

الأم : (تخرج وقد غيرت ملابسها) الدنيا اتزحمت كده ليه ..
(أمينة تعبر الصالة ومعها كوب الماء ، ثم تعود به فارغا)

أمينة : أطلع طقم الشربات ياماما ..

الأم : ليه ؟ هو احنا ح نعمل فرح ..

أمينة : ده أكثر من الفرحة ياماما .. هو فراق أربع سنين شويه ..

الأم : (تجلس متنهدة) آه .. أربع سنين ، مش عارفه فانتوا ازاي ..

أمينة : بكيتي فيهم .. أربعين مرة ، ولا نسييتى ..

صوت من الخارج : (تسمعان صوت جلبة فى الخارج . دق الجرس ، ودق على الباب) افتحوا يالى جوه .. افتحوا ..

الأم : ده صوت عمرو ..

أمينة : (تهرع الى الباب وتفتحه) طيب .. طيب ..

عمرو : افتحى الدلفة الثانية ..

(تفتح أمينة الدلفة الثانية . يدخل عمرو حاملا صندوقا كبيرا يضعه جانبا ، يتبعه حسين ومنير يحملان ثلاثة ملفوفة باحكام ، يضعانها جانبا ، صوت عمرو يقترب . بعد خروجه وعودته) .

عمرو : التليفزيون ح يتحط فين ؟

منير : ساعدي عمرو يا أمينة ، نزلوه بالراحة أحسن ينكسر ..

عمرو : نعطه فين ؟

منير : (يشير الى الكتبة) هنا .. هنا .. انت يا عمرو ومعك حسين هاتوا الغسالة ، وخلي السواق يطلع حاجة معاكم ..
(عمرو وحسين يخرجان .. ينظر منير الى أمه .. تنظر اليه) ..

منير : يصرخ في ابتهاج ويهرول نحوها وقد وقفت لاحتضانه (ماما .. ماما ..

الأم : (تقبله كثيرا) حبيبي يامنير ..

منير : ازيك ياماما ..

الأم : حمد الله على السلامة يا ابني ..

منير : واحشائي قوى ..

(يدخل حسين وعمرو يحملان الغسالة)

عمرو : ح تتحط فين دي ؟

منير : (يتخلص من ذراعي أمه ، يضع بعض الكراسي فوق البعض الآخر يفسح مكانا) هاتها هنا ، أيوه ، بالراحة ..
(يدخل السائق يحمل كرتونة كبيرة) هات هنا يا أسطى ..

الأم : (تدور حول نفسها) ايه يا ابني الحاجات دي كلها ؟

أمينة : ولسه ياماما .. فوق العربية قد دول كمان ..

الأم : (تجلس متنهدة) هيه الشقة فيها مكان يكفى البنى آدمين؟

منير : آمال بابا فين ؟

أمينة : (تشير الى حجرة الأب) جوه ..

منير : أما اسلم عليه (يدلف الى الحجرة) ..

عمرو : شفتوا بقه ، لولا الحاجات دى ما كانش بيعت لنا فى
آخر لحظة ..

حسين : قصدك ايه ؟ احنا شياطين يعنى ..

عمرو : حاجة زى كده ..

الأم : اخص عليك يا عمرو ، وانتم بتساعدوا أخوكم ..

حسين : أيوه يا أخى .. امال ح نسييه محتاس ..

منير : (يخرج من الحجرة) انتوا واقفين ليه ، ياللا هاتوا بقيت
الحاجة ..

عمرو : بتأخذ نفسنا .. وننشف عرقنا ، ولا الدنيا طارت ..

منير : (ينظر اليه فى غضب) براحتك ياسيدى ، طبعاً ح تتبسط
لما السواق يشيل حاجة لوحده ، وتقع تنكسر ..

حسين : ما تزعلش يا خويا .. أنا نازل ..

الأم : قوم مع أخوك يا عمرو ..

منير : (لعمرو) لا .. خليك .. أنا مستغنى عن خدماتك
ياسيدى ..

(يسمع صوت سقوط على السلم)

عمرو : (يهرول خارجاً) فيه ايه ؟

منير : (على باب الشقة) عاجبك كده .. مبسوط دلوقتى ..

عمرو : (يدخل ثانية) مبسوط ولا مش مبسوط .. انت
مأجرنى .. ما الى ينكسر ينكسر ..

الأم : (تخطب صدرها) ليه كده يا عمرو .. (لمنير) ايه الى
انكسر ؟

منير : أنا عارف .. اما اشوف ايه (يخرج)

أمينة : ده أكيد صوت صيني ..
منير : (يعود ومعه صندوق متوسط الحجم ، يضعه أرضاً)
صندوق الصيني ياستى .. عشان يعجب عمرو أفندى ..
الأم : معلش ، الحمد لله اللى جات على كده ..
منير : ما هو لو ..
عمرو : ما تهووش .. فى ستين داهية ..
منير : انت قليل الأدب ..
(تدور معركة كلامية لا يسمع فيها الأصوات ، يخرج الأب
من حجرته ، ويهدى ولديه منير وعمرو ، يأخذ المسرح
فى الاظلام تدريجيا ، تدق موسيقى شبه حزينة لفترة
قصيرة ، ثم يعود الضوء تدريجيا ، وقد كفوا عن العراك ،
ويقوم حسين وأمينة ومنير برص الصناديق ، وترتيبها ،
والنفوس وقد هدأت .. تظهر أمينة آتية من المطبخ ، توزع
على الجميع أكواب الليمون)
الأم : الحمد لله يا ولاد ، كان لازم يحصل حاجة ، وآهى حصلت ..
عمرو : أنا متأسف يا منير .. غصب عنى ، أعصابى تعبانة
شوية ..
منير : خلاص يا عمرو .. أنا نسيت اللى حصل ..
الأب : لازمته ايه الحاجات دى كلها ، كنت وفرت فلوسك ..
منير : فرصة يا بابا ، الحاجات دى رخيصة بره ، وكلها ضرورية ..
علا : (بتكشيرة) وهيه شقتك ح تاخذ ده كله ؟
منير : لا طبعاً .. أنا ناوى اشوف شقة هنا ، مش قادر أعيش
هناك ..
الأم : تفكر ح تلاقى ؟

عمرو : ما دام معاه فلوس يلاقى ، عندك استعداد تشتري ..
 حسين : (لعمرو) على رأيك .. البلد بقت كلها شقق مفروشة ..
 منير : (ضاحكا) هو أنا قد التملك ..
 الأب : آمال ح تدفع أعوذ بالله خلو ؟ لا يا أبني ، لا ..
 منير : خلو ايه يا بابا ..
 حسين : مافيش حاجة اسمها خلو دلوقتي .. بقوا يقولوا مقدم
 ايجار ..
 منير : أنا الأول ح أشوف حد يبادلني ، آخذ شقته ويأخذ شقتي
 في أسيوط ..
 حسين : لا ، شيل الفكرة دي من دماغك ، مين عنده استعداد
 للتضحية دي ..
 منير : تضحية ، تضحية ايه ؟
 حسين : مش ممكن طبعا ، حد يبقى تحت ايده شقة هنا ويسيبها
 (ينظر ناحية عمرو) ده يبقى لمؤاخذة ما يفهمش ..
 عمرو : (متضايقا) احترم نفسك يا حسين ..
 حسين : أنا بأقول اللي بيتوله كل الناس ..
 منير : جرى ايه .. زعلت ليه يا عمرو ..
 عمرو : لا ، ولا حاجة ..
 حسين : شوف يامنير يا أخويا ، اللي حاطط ايده على شقة النهاردة
 عمره ما يسيبها .. ولا بيعها ، ولا حتى يبادلها ولو كان
 محتاج للبدل ، يباجرها مفروشة ، وح يكسب دهب ،
 يمكن يستقيل من شغله ولا يفرطش في الشقة ..
 علا : فعلا .. ده اللي ماجر شقة مفروشة بيعيش ملك ..

منير : (بدمشة) ياسلام ، للدرجة دى ..

حسين : أمال .. دى أحسن استثمار فى البسلة .. أحسن من البيوت الملك .. الى بتتحكم القوانين فى إيجاراتها ، وأحسن من الأطيان .. أنا أعرف ناس باعت أرضها وعملت عمارات أجرتها مفروشة ..

عمرو : (يضع يده على جبهته) والله فكره .. كانت تايهه ليه عن دماغى ، اشوف لى شقة مفروشة اقعد فيها ..

علا : و ح تقدر على إيجارها يا عمرو ..

حسين : والله أحسن من البهدلة دى ..

علا : ح يقدر يدفع ميتين جنيه فى الشهر ، ده على الأقل ..

منير : ليه يا علا ، هوه لازم يقعد فى الزمالك ..

علا : بعدك عن البلد خلاك بتستغرب ، ده غير أجرة البواب ، والكهرباء ، والمياه ..

حسين : مش بأقولك ح تتعب هنا يا منير ، ياريتك استقرت بره ..

منير : انتوا خلّيتونى أحس بالقلق .. المهم دلوقتى .. أنا مضطر أسافر أسيوط ومعلّش ، اعذرونى ، ماقدرتش أجيب لكم هدايا .. (يخرج حافظة نقوده) على العموم ، كل واحد يشتري الى هوه عايزه .. (يخرج رزمة نقود ، ويوزعها عليهم) ..

عمرو : تشكر يا منير خلى فلوسك ، هو احنا صغيرين ..

حسين : (لعمرو) اسكت انت .. أيوه صغيرين (يمد يده لمنير) لايمنى ..

منير : خد ياسيدي (يعطيه مائتي جنيه) .
 حسين : ايه دول ، دنا قلت ربنا ساقك عشان تفك زنتي ..
 منير : متين جنيه ، فك زنتك ..
 حسين : ما ينفعوش ..
 منير : (بيد يده بنقود أخرى) أدى خمسين كمان ..
 علا : (لحسين) ما تبقاش طماع ..
 حسين : ما انت عارفه ظروفى ..
 منير : ماتنسوش ان الى ح يفضل معايا يدوب جمرك العربية ،
 و ..
 حسين : (يقاطعه) أهى دى بقى ما كانش لها لازمة بصحيح ..
 علا : (فرحة لمنير) دى أهم حاجة جبتها معاك .. ح تنفع قوى ..
 حسين : (ساخرا) تنفع ، بكرة تشوفوا ، ح يزهد منها بسرعة ،
 البلد زحمه ، والشوارع مكسرة ، يعنى فلوس بتترمي فى
 الأرض ، اسمع يامنير ، أنا ح اعفك من الهدية ، كملهم
 خمسميت جنيه واعتبرهم سلف ..
 منير : (ينظر اليه بانزعاج) ايه .. (يشير الى علا) آمال الى
 لسه ماكسبتش ولا ملهم دى تأخذ كام ؟
 عمرو : وهيه التزاماتها ايه .. بتاكل وتشرب وتلبس .. عايزه
 ايه تانى ..
 علا : (متبرمة) مش عايزه حاجة .. (تهب واقفة وتذهب
 الى حجرتها) ..
 منير : علا .. علا .. (تعود علا)
 الأب : سيبك منها ، سيبك منهم كلهم .. وقوم شوف مصالحك ..

الأم : ما تسببه قاعد وسط اخواته شويه ..
الآب : ومراثة .. زمانها منتظراه على نار ..
منير : (وهو يعيد محفظته الى جيبه) حد عرف انى جاى ..
الأم : ما قلناش لحد ..
منير : أحسن .. مش عايز حد يعرف ، اما انفض من مشاغلى
ابقى أزورهم وأسلم عليهم فى بيوتهم ..
الأم : بس يامنير .. اعمامك .. وخالاتك يا ابنى ح يزعلوا ..
منير : ح أروح لهم فى أقرب فرصة ..
الآب : أقرب فرصة يامنير ، ما تخرجناش .. مافيش حاجة
بتستخبي .. ماتوقعناش فى الغلط ..
منير : يا بابا انت شابيف الشقة زحمه ، وأنا مشغول ، و ..
الآب : معاك حق يا ابنى .. طيب أختك هند وجوزها ..
منير : ح اعدى عليهم قبل ما أركب ..
الأم : روح لهم البيت القديم .. أصلهم ..
منير : (يقطعها) هما سابوا شقتهم ؟
الأم : مش قاعدين فيها ..
منير : يبقى مش رايع ..
الآب : ليه يا ابنى .. أختك تاخد على خاطرها ..
منير : دى حته أوده يا بابا .. الواحد يقعد على السرير والا على
الأرض ..
الأم : انت ح تسلم عليهم على الواقف ..
منير : بلغوهم سلامى .. وأما أرجع من أسنيوط اشوفهم ..

أمينة : أختك ح تزعل يا منير ..
منير : أبقي إصالحها .. انا ح امشى ..
حسين : انت شلت محفظتك يعنى ..
منير : اما أخلص جمرك العربية ابقوا خدوا الى انتوا عايزينه ..
حسين : (يضرب كفيه) مش نقت فيها ست علا ..
(یرن جرس الباب ، تقوم أمينة وتفتحه ، يدخل حسان
يمسك بيده طفله وزوجته هند تحمّل طفلتهما)
حسان : (فى بشاشة) مش معقول (يصافح منير) ..
هند : (بعد أن تقبل أمينة تندفع نحو منير وتحيطه بذراعيها)
منير .. حمد الله على السلامة .. (تلتفت نحو أمها) بقى
كده يا ماما .. (تترقق الدموع من عينيها) ..
منير : (تتحرر من ذراعيه) ازيك يا هند .. بلاش الدموع ..
حسان : يا ست ماتزعليش .. المهم انه جه بالسلامة .. واحشنا
يا راجل ..
الأم : كان ح يفوت عليكم قبل ما يسافر ..
حسان : يسافر فين تانى ؟
علا : للندام يا أخى ..
حسان : (يضحك) آه .. كنت ناسى (يصافح الأب والأم) لمؤاخدة
المفاجأة خدتنى .. ازيك يا عمى ، ازيك يا نينه ..
الأب والأم : الله يسلمك ..

هند : (مازالت متأثرة) يعنى لو ما كناش جينا ما كنتش
ح اشوفك ..

حسين : ما انتوا جيتوا ع الريحه وخلص بقى ..

هند : (لحسين) أيوه يا أخويا .. طبعا انا آخر من يعلم ..

علا : (تأخذ الطفلة) هات الامورة دى ..

هند : دى نايمة ..

علا : ح أدخلها جوه .. (تدخل بها الحجرة) ..

عمرو : فعلا يا هند .. أنا كنت جاي معاه وأوصله لما يركب ..

هند : (باحتجاج) يا عمرو .. انت يا عمرو .. الكلب المقترس ..

لسه واقف على بابنا ..

عمرو : ظروف يا هند .. ظروف ..

هند : (تلمح اينها يقف بجوار باب الشقة) تعال يا حبيبى ..

واقف كده ليه ، تعال .. سلم على خالك منير ..

حسان : وجه جديد عليه (يشير بيده الى منير) ده يا ابنى يبقى ..

خالك منير .. الدكتور منير .. مد ايدك سلم عليه ..

منير : (يأخذه بين ذراعيه ويقبله) اهلا يا حبيبى .. اسمك ..

ايه ..

الطفل : ماهر يا خالو .. (يتخلص ماهر من ذراعى خاله ويلوذ ..

بذراعى أبيه) ..

حسان : خالك الدكتور كان مسافر ..

الأب : الله يلعن الزمن ..

حسان : آه والله يا عمى .. أنا دايمًا بأقول حياتنا دى ربنا مش ..

راضى عنها .. (لعمرو) فينك يا راجل ..

عمرو : فى الدنيا الواسعة ..
هند : هدى عامله آيه ، والولاد ..
عمرو : كويسين ..
هند : (لأمها) آيه اخبار صابر ..
منير : فكرتبنى يا هند .. صابر فىن يا ماما ..
الأب : فى الجيش،ربنا يسهل ، فاضل له شهرين تلاته ويخرج ..
الأم : (متأثرة) ما بينزلش الا كل شهر مرة يا عين امه ..
أمينة : حظه جه على الحدود ..
منير : كان نفسى أشوفه .. تصوروا أكثر الجوابات اللى جات لى
منه ..
حسان : طبعاً ، قاعد فى الهوا ، الجوابات أحسن تسلية ..
هند : (لزوجها) تنكر انه كل أجازة يزورنا ..
حسان : لأ طبعاً .. صابر ده ودود جدا ..
هند : (لعمرو) هدى والولاد ما جوش ليه ..
عمرو : ما يعرفوش .. أصلى ماروحتش من امبارح ،
مين ح يجيبهم ..
حسين : (وهند تنظر اليه) ليل زمانها جايه ..
حسان : والله سلامات يادكتور ، فاكر .. آخر حاجة شفتها فى
مصر كانت ليلة دخلتنا ..
منير : طبعاً فاكر ..
حسان : العيلين دول جبناهم وانت مسافر ..
منير : ربنا يخليهم لكم ..

حسان : عقبال ما يجيك عفريت زى ماهر (يداعب ابنه الجالس فوق ركبتيه) .

ماهر : أنا مش عفريت يا بابا ..

حسان : أمال ايه ياسيدى ..

ماهر : أنا سندباد ..

حسان : (للأب) ما يفرکش سكوتة ياعمى ..

هند : ده خلانى أقطع الخلف ..

أمينة : هو انت ح تخلفى تانى ياهند ..

حسان : أمال .. انت عايزه أبويا يحرمنى من الميراث .. ده مصمم

انى أخلف عشرة .. (يضحكون) .

الأم : ياشيخ حرام عليك .. ثلاثة أو أربعة كفاية ..

عمرو : الله يديك العافية ..

حسان : (يضرب صدره بيده) الحمد لله .. أحسن حاجة فى

الدنيا العيال .. (لأمينة) أمال احنا بنتجوزكم ليه ؟

علا : (تخرج من الحجرة) سنة الحياة ياسى حسان ..

حسان : والعيال داخلين فى السنه دى ..

عمرو : (لحسان) استلمت شقتك ولا لسه ..

حسان : بيبه ..

الأم : يالهوى ، انت كمان ..

حسان : أنا كمان ايه يانيه ..

الأم : ضاعت منك الشقة ..

حسان : لا يانيه .. فهمتيني غلط ، أنا خدت فلوسى وسبتها ..

منير : ياخسارة .. سبتها امتي ..
حسان : من شهر تقريبا ..
منير : كنت دافع فيها كام ..
حسان : ثمانية فى عين العدو ..
منير : تلاقيها طبعاً اتباعت ..
حسان : واقفين طابور وحياتك ..
الأب : مافيش نصيب ، منير أصله عايز شقة ..
حسان : آه .. بس دى لسه فى الهوا .. الراجل بيبنى الدور
الثالث ..
هند : وتصدق بامنير .. العمارة محجوزة لحد الدور السادس
الى كنا حاجزين فيه ..
منير : انا كنت فاكرها جاهزة ..
حسان : آمال أنا سبتها ليه ، عيال ما استلمها يكون الولد ده دخل
الجامعة ، الحقيقة أنا فكرت ، لقيت أحسن لى اشتري أرض
.. وابنيها ..
الأب : (فى سعادة غامرة) والله برافو ، أحسن حاجة فكرت فيها
يا ابني .. هو ده التفكير الصح ..
حسين : طلعت فى تفكيرك أحسن من ناس كثير ..
عمرو : واشتريت الأرض ..
حسان : آمال ، فى نفس اليوم أحسن ما الفلوس تطير .. حاكم
الفلوس الأيام دى زى الرز بتتاكل بالملعة ..
الأم : اشتريت فين يا حسان ..
هند : بعد مصر الجديدة بشويه ..

حسان : نص ساعة بالعربية ..
حسين : العاشر من رمضان ..
حسان : مش فى العاشر نفسها ، قبلها ييجى بربع ساعة ،
انما ايه حته حلوة قوى ..
عمرو : دى بعيدة عن شغلكم ..
حسان : هيه دلوقتى بعيدة .. كلها كام سنه ومبانى مصر الجديدة
تلزق فيها .. عيال العيال ما يكبروا .. اهتياى كده على
أيامهم لا ح يبقى فيه شقق ، ولا فيه وظائف ، ولا فيه جواز
.. والله الواحد خايف على مصير الأولاد ..
هند : وشقتنا أهى موجوده برضه للزمن ..
الأم : يا اختى ، بكره تخشها الميه ، ولا تروحوا هنا ولا هناك ..
حسان : ياريت يا نينه .. على العموم كل الناس بتجربى ورا
الميه ، لموا فلوس ، وربنا يسهل ..
منير : (لحسان وهدى) ما فيش حد من زمايلكم من أسيوط ..
حسان : أسيوط ، يا جاه النبى ..
هند : ليه ؟
منير : أديله شقتى وآخد شقته ..
حسان : ياراجل .. ده كل الاسايطه عايزين ييجوا هنا .. فيه
حد يقل عقله ويروح هناك ..
الآب : وهيه اسيوط وحشه .. اهتياى احسن من هنا ..
منير : بكتير ، لا زحام ، ولا ضوضاء ، حياة مريحه ..
حسين : المشكلة مش فى المكان ، المشكلة فى الارتباط بالشغل ..
حسان : بالمناسبة ، لقيت عقد ولا لسه ..

حسين : لقيته ، ربنا يسهل ..
هند : فين يا حسين ؟
حسين : السعودية ..
الأم : ربنا يوفقك وتحجيني انا وأبوك ..
الأب : ربنا يوعدنا ..
هنير : ياسلام يا بابا .. انا مستعد من دلوقتي .. انتوا اتنوا
وانا تحت أمركم ..
الأب : يا ابني انت ظروفك ملخبطة .. أما تستقر الأول ..
هنير : مالكش دعوه بأى حاجه ..
الأم : أبوك عنده حق ..
حسين : خلى الموضوع ده عليه ، ان شاء الله فى موسم الحج ابعت
لكم دعوة ..
عمرو : على الأقل توفروا نص المصاريف ..
الأم : (تمصص شفيتها) ربنا يوفقك الأول ..
حسين : البركه فيكى ياماما (يغمز لها بعينه ناحية هنير)
الأمينة : (ترى حركته لأمه ، تضحك ، تعقب) الا عملت آيه فى
الفلوس ..
حسين : أنا ولىلى دبرنا نص المبلغ ..
هند : باقى كام ..
حسين : نص الالف ..
حسان : ياه ده مبلغ كبير قوى .. لو عرفنا قبل ما نشترى
الأرض ..

حسين : اشكرک يا حسان ، انا عارف انك ما تتأخرش ..
حسان : (يضع يده في جيبه) على كل حال الموجود يسد خانه
(يخرج مائة جنيه يقدمها لحسين) خد وكمل
حسين : متشكر قوى يا حسان ، انا ح اتصرف .. (ينظر في
ساعته بحرج) مش عارف ليلي اتأخرت ليه ..
حسان : حد قدك يا عم .. انت اللى مستريح ..
هند : (متصنعة الغضب) حسان ..
حسان : أنا غلطت ، الراجل اتجوز من غير ما حد يحس ، لا حمل
هم شقه ، ولا جهاز ، ولا ..
حسين : آمال أنا مسافر ليه ؟
حسان : زيادة الخير خيرين ..
حسين : المثل بيقول اللى ايدته فى الميه ..
حسان : الظاهر كله بقت ايدته فى النار .. (يضحك بصوت
عال)
علا : أيوه كده ، نفسنا نسمع الياهاه دى من زمان ، شايفه
ياماما الله حلوة ازاي ..
الآب : مين يحس بكده ..
علا : أنا يا بابا كفايه (تضحك) ..
الأم : فين الشاى يا أمينه ، احنا نسينا نفسنا ..
أمينة : (تقف) شاى ولا شربات ..
منير : (ينظر فى ساعته) الوقت سرقتنا فعلا ..
الأم : خليك للصبح ، الوقت اتأخر ..

الآب : السفر غير مأمون في الليل ..
منير : مضطر أسافر ..
حسان : ياسيدي ، ماجأتش من ساعات بعد السنين دى كلها ..
عمرو : (يقف ، يتثأب) ، عن اذنكم ، انا ماشى .. أحسن زمان هدى قلقانه ..
منير : ابقى سلم عليها وعلى الأولاد ..
حسان : ماجبتهاش معاك ليه ، كنا نشوفهم بالمرة ..
عمرو : عند مامتها ..
هند : خلصت شقتك ولا لسه ..
عمرو : لسه شويه (يتأهب) عن اذنكم
(يتبادلون السلامات وينصرف عمرو)
الأم : (تمصص شفيتها) شقة ايه ياهند ..
هند : مش كان بيشطب شقته الجديدة ..
حسان : مالك يانيه ..
الأم : الشقة ما ضاعت .. استولى عليها واحد تانى ..
هند : ازاي ياماما ..
منير : يعنى ايه استولى عليها ، وابنك كان فين ..
الآب : اخوك اندب وضيع نفسه ، لا طال الشام ولا اليمن ..
منير : يعنى ايه ..
حسان : وغوشتونا ، ايه الى حصل ..
علا : ببساطة ، انضحك عليه ، ابن صاحبة العمارة نصب عليه ..
منير : دى حاجة ما يتسكتش عليها ..

الأم : يوه ، ده وصلت القسم ، والنيابة .. حكاية طويلة ..

هنده : كل ده واحنا مانعرفش ..

حسين : الحكاية كلها حصلت فى يومين ، وما كناش فاضيين
تبلغكم ..

هنده : مسكين ياعمره ..

منير : ووصلتم لايه ..

الآب : النيابة أثبتت الحالة ، وأخوك رفع قضية ..

حسان : ايه اللى بيحصل ده يا عالم ..

الأم : الناس بتاكل بعضها ..

الآب : لا يا ابنى .. الناس ما يقتش تشوف الا تحت رجلها ..
ماحدثش بيص لقدام .. يعنى أنا عشت عمرى كله ،
وما فيش حاجة نفصت عليه عيشتى الا انى ما قدرتش أعمل
بيت لأولادى كانوا النهارده فى غنى عن اللى بيحصل ده ،
لكن أعمل ايه ، الايد كانت قصيرة ، كل الدخل بينصرف
على المدارس ، قلت لنفسى يمكن لما يكبروا ، يقدروا يعملوا
الى أنا ما عملتوش لكن خاب ظنى .. كل واحد شرد فى
ناحيه ، كل واحد شوره من دماغه ، كل واحد فاكر ان
الآب أو الأم دول ناس تفكرهم على قدمهم ..

منير : (يضرب كفيه) الواحد من يوم ماجه بيسمع حاجات لها
العجب ..

الآب : ايه .. ربنا موجود يا ابنى ..

حسان : ربنا غضبان على الناس كلها .. عشان كده سايهم
يطلعوا أسوأ ما فيهم .. وأكبر دليل ، حكاية الفيران اللى

كبرت وعنتقت ، حد كان يصدق ان الفأر يخوف القطعة ان
ما أكلهاش .

الأم : الا حكاية الفيران دى رخره .

الآب : ربنا بس يستر ، وما يظهرش وباء .

هند : وباء ، دى تبقى كارثة .

حسان : فعلا كارثة ، الزحام ده مصيبه .

أمينة : (تعود بصنية الشاى ، تضعها ، تقدم الأكواب) كفاية
كوارث . اشربوا الشاى .

حسان : (ضاحكا) مش قلت فيه شربات .

أمينة : جاهز وحياتك ، حطيتنه يسقع فى التلاجة .

حسان : دنا باضحك يا شيخه ، نشربه ان شاء الله يوم فرحك .

علا : يبقى مش ح تدوقه . الهانم عامله اضراب .

حسان : لا . مش معقول .

هند : بطل هزار ياعلا .

أمينة : الحقيقة ، أنا مش ح اتجوز الا بعد علا .

حسان : ليه بقى ، عايزه تشوفى الجواز ح يعمل فيها ايه .

أمينة : مطبوط ، نفسى افرح فيها .

حسين : (يضع كوبه فارغا ، يهب واقفا) مابدهاش بقى ،
أنا ح أروح أشوف ليلي ما جاتش ليه ؟ .

الأم : ابقى طمنا .

حسين : بكره ان شاء الله نيجى شويه (ينصرف) .

الجميع : مع السلامة .

منير : (يقلق) كان لازم أسافر النهارده ..
الأم : خليك بايت معانا الليلة ..
منير : (يقف فجأة) لا مش ممكن .. دنا بكره مسافر
اسكندرية ..
حسان : ليه .. انت ح تقضى حياتك سفر فى سفر ..
الأم : (بسرور) عقبال عندك اشترى عربية ..
حسان : ما شاء الله ..
منير : ربنا يسهل وتخلص بكره ..
حسان : فعلا .. صلى وصوم وادعى ربنا تخرج من الجمر
بالسلامة ..
منير : (يقف متأهبا) لازم أسافر دلوقتى ..
الأب : يا ابنى الدنيا ليلت ..
منير : المواصلات ماشيه طول الليل ..
الأم : وتروح تقلقها نص الليل ..
حسان : سببيه يانيه .. الراجل مراته واحشاه .. أنا لو منه
كنت طلعت عليها على طول .. (لهند) شوفى بأحبك
قد ايه (هند تبسّم) ..
منير : (يصافحهم) ح نشوفكم قريب ..
هند : احنا الى ح نستناك ..
منير : ان شاء الله ..
حسان : با أقول ايه ياهند ، ما ننزل معاه .. أهو ح يركب من
الجيزة ياخدنا فى سكتة ..

هند : (لحسان) احنا مش ح نبات هنا ..
حسان : ما فيش لزوم ..
الأم : خليكوا بايتين ، البنت نايمه ..
حسان : اشيلا انا ..
الأب : جرى ايه يا ولاد ، انتم مستعجلين ليه ..
الأم : أنا عارفه ، طيب استنوا اما نتعشى ..
حسان : المرة الجايه يانيه ..
(ينصرف منير وحسان وهند وطفلاهما)
الأب : أنا عايز كباية لبن .. أشربها وأحمد ربنا ..
علا : أنا ماليش نفس ..
الأم : يعني أنا وأميينة بس ، براحتكم ، حضري لنا لقمة خفيفه
يا أميينة ..
الأب : (يتلفت حواليه) وحاجات ابنك دي ح تفضل كثير هنا ..
الأم : أنا عارفه ..
علا : طبعا ح تقعد .. مش معقول يوديها أسيوط ويرجعها
تاني ..
الأم : قومي يا أميينة ..
أميينة : (تنهض) حاضر ياماما ..
(يندق جرس الباب ، تذهب اليه أميينة)
أميينة : (تفتح وترحب) أهلا ياعمي ، اتفضل (وتذهب الى
المطبخ) ..
سالم : ابعثي أبوك يابنتي يساعدي ندخل عمك هلال ..
الأم : (في دھول) هلال ..

الأب : (ينهض مسرعا) حاضر يا أخويا .. أنا جاي .. خشى
ياعلا روقي السرير يابنت ..

(يدخلان وهلال مستندا الى كتفهما ، يدخلان به الى حجرة
الأب ، يعودان) .

سالم : ما تأخذنيش يا أخويا ، هوه اللي صمم ييجي دلوقتي ،
حاولت معاه ، يهديك يرضيك ، طيب الصبح ، قال لازم
أروح دلوقتي .

الأب : بيته ومطرحة ..

سالم : معلش ، مش ح أقدر أقعد ، التاكسي واقف تحت ..

الأب : بالسلامة يا أخويا .. (يودعه حتى الباب ، يفلق الباب
ويعود) قومي يا أم منير سلمى عليه .. وشوفي يمكن
عاوز حاجه ..

الأم : (تنهض متثاقلة ، متبرمة) حاضر ، أنا قايمه ..

الأب : (لعلا) اعملي كويابة لمون لعمك (يدخل وراء الأم)

عسلا : أنا داخله أنا (تسرع الى حجرتها) .

الأب : (زاعقا) يا أمينة ، يا أمينة ..

أمينة : (تظهر في الصالة) أيوه يابابا ..

الأب : اعملي لمون لعمك ..

أمينة : حاضر يابابا ..

الأم : (تعود وتجلس مكانها) ربنا يصبرنا ..

(تعبر أمينة الصالة بكوب الليمون ، ثم تعود بعد تقديمه

لعمها) أمينة ، انت تعبانه طول النهار يابنتي .. خشى
نامي ..

مهزلة عائلية - ٤٩

أمينة : مش ح تاكل ياماما ..
الأم : نفسى انسدت .. اتعشى انت ..
أمينة : النوم أحسن ..
الأب : (يعود ويديه الكوب فارغا ، يضعه على المنضدة الصغيرة ،
يجلس) ربنا يشفيك ياهلال يا أخويا ..
الأم : ربنا يريحه من اللى هو فيه ..
الأب : (غاضبا) يعنى إيه يا أم منير ..
الأم : يعنى يشيل عنه ، يا ..
الأب : (يوقفها بإشارة يده) بس .. كفاية ..
(يخفت صوتاهما بينما يحتد بينهما النقاش ، يشيح كل
منهما للآخر بيده ، يأخذ الضوء فى الحفوت)

« سستار »

الفصل الثالث

(نفس المكان ، الثانية عشرة ظهرا ، بعد أسبوع من أحداث
الفصل الثاني)

الأم : يعنى أخوك ما ورائناش وشه .

الأب : الله أعلم ظروفه إيه ..

الأم : ظروف إيه .. ده تلاقيه ما صدق رمت لنا هلال هنا وادى
وش الضيف .

الأب : ليه .. هوه كان عال عليه .. ولا كان عال عليه ..
ده اخونا الكبير .. ولو كان عضم فى قفه ..

الأم : حتى أختى ما فكرتش تطل علينا والولاد .. الى ما فيه حد
قال أما أروح اشوف عمى ..

الأب : ان بعض الظن اثم .. عارفها صاحبة عيا ، يمكن عيانه
.. والولاد كل واحد عنده مشاغله ..

الأم : (فى اضطراب) عيانه .. يبقى لازم أروح اشوفها ..
مين قال لك .

الأب : أنا باقول يمكن ..

الأم : برضه واجب أروح لها ..

الأب : انت قادره تمشى ..

الأم : ربنا يقوينى .. بس اما حد من الولاد يبجى يروح معايا ..
ولو ربنا بيحبنى منير يبجى بالعربية .

الأب : (مقهقها) والله صبرت ونلت يا أم منير - ابنك بقى عنده
عربية .

الأم : (تضرب صدرها بيدها) ح تستكشر عليه اركب مع ابنى
عربيته ..

الأب : حاشا لله ..

صابر : (يخرج من حجرة أبيه وهو شاب فى الثانية والعشرين
من عمره ، قوى البنين ، يتثاب (ياسلام ، ليلة فى السرير
هنا تسوى شهر فى الكتبية ..

الأب : نوم العوافى ، عمك صحى والا لسه نايم ..

صابر : نايم .. (يتلفت حواليه) امال فى أمينة ..

الأم : راحت السوق

صابر : الجرايد جات ..

الأم : اغسل وشك الاول ، عبال ما أعمل لك شأى .. (تحاول
النهوض)

صابر : خليك مستريحة .. أنا ح أعمله .. حد يشرب معايا ..

الأب : أنا لا ..

الأم : ولا أنا ..

(صابر يتجه الى المطبخ والحمام) ..

الأب : (يمسك بجريدة الامس) اما نشوف الدنيا فيها ايه ..

الأم : ده جرنان امبارح ، وكمان ح تتعب عينيك ..

الأب : هوه أنا بأفليه .. يادوب اقرأ العناوين الكبيرة ..

الأم : والله فكره ..
الأب : (ينحى الجريدة) خير ..
الأم : آخذ صابر ونخطف رجلنا نشوف اختي ..
الأب : مش قلتى اما ييجى منير ..
الأم : ناخذ تاكسى ..
الأب : آه .. يبقى ان شاء الله ح تطلعى لحد الشوارع ، وبعد
ساعة بتيجى وتقولى مارحناش ..
الأم : لو صابر يرضى يروح ..
الأب : ياويله .. احنا ح نمشوره ، نازل أجازة يستريح ..
الأم : كلها ساعة زمن .. هوه خفيف عنى ..
الأب : انتى حره معاه (يعود الى الجريدة)
صابر : (يعود) كباية شساي ايه .. منجهه .. تاخذ شويه
يا بابا ..
الأب : بالهنا والشفاه ..
صابر : (يجلس أمام المنضدة) وبعدين .. الحاجات دى ح تفضل
متلقحة كده ..
الأم : ح نعمل ايه ..
صابر : حطوها فى المنور ..
الأم : (بسرعة) انت عايزها تعدم من التراب ..
صابر : ياستى ما هى ملفوفة كويس .. ياما حاجات زيتها بتترمى
فى الجمارك شهور ..
الأم : انت عايز اخوك يزعل ..

صابر : خلاص .. أنا ح أقول له ينقلها عنده ..
الأم : لو كان في نيته ينقلها كان نقلها ..
صابر : ما هو ما ينفعش كده .. الصالة عاملة زى المخزن ..
هلال : (صوته يأتى من الحجرة) يا صابر .. صابر ..
صابر : (يقف بالباب) أيوه يا عمى .. عاوز حاجة ..
هلال : ابعث لى أبوك يابنى ..
الآب : (يترك الجريدة) أنا جاي لك يا هلال .. (يدخل الحجرة
ثم يخرج الى الحمام ويعود وفي يده موبولة .. يهرول صابر
الى أبيه) ..
صابر : عنك انت يا بابا .. (يأخذ الموبولة ويدخل الحجرة ويفلق
بابها) ..
الآب : (فى انشراح) يا سلام يا صابر .. ابنى بصحيح .. نفسك
حلوة وابن حلال .. ربنا يوفقك ..
الأم : (فى غضب) .. يا فتاح يا سليم ..
الآب : أيوه .. طالع لابوه .. (يتهم) معدته ما بتتقلبش ..
نفسه ما بتغمش عليه .. نفسه حلوة .. فاهمه يعنى ايه
نفسه حلوه ..
صابر : (يخرج بالموبولة الى الحمام ، يعود يجلس لتناول الشاى)
أمال عمرو فين ؟
الأم : راح الشغل ..
صابر : (يضحك) .. أنا فاكر الناس كلها فى أجازة زى ..
الأم : والله أخوك ده صعبان عليه ..
صابر : ياستى ، خليه ياخذ له شويه دروس ..

الأم : هو ناقص ، والا كان ناقص ..
صابر : ولسه .. هو لسه شاف حاجة ..
الأم : اخص عليك يا صابر .. ده بدل ما تحاول تساعد في مشكلته ..
صابر : اعمل له ايه .. كل الناس عايشة في مشاكل .. له أول واحد ولا آخر واحد ..
الآب : (يدندن) هذا جنته على أمي ، وما جنيت على أحد ..
الأم : (في غضب) أبو منير ..
الآب : أنا باسلي نفسي ..
الأم : تسلي نفسك على حساب أعصابي ..
الآب : وما لها أعصابك ما هي زى الحديد ..
الأم : طبعاً ، ما أنا بأأنام وانفخ بطني ..
الآب : وما أنا مش أليه ..
صابر : الحقيقة ياماما .. سيبى كل واحد يحل مشاكله بإيده ..
الأم : يعنى نتفرج عليه وهو بيغرق ..
صابر : (ضاحكاً) هو لسه ما غرقش .. قولى نتفرج عليه وهو بينقذ نفسه .. ع الأقل نحس انه بقى راجل ..
الأم : زى ما تكون فرحان في أخوك ..
الآب : حد يفرح في أخوه برضه يا أوليه ..
صابر : انا الحقيقة فرحان له .. لأنه ح يبقى راجل .. المشاكل هيه اللى بتعمل الرجالة ..
الأم : يا أخويا ، بطل فلسفة ..

صابر : دى الحقيقة يا ماما .. تعرفى انى بخجل لما يقعد حد من اخواتى مع اصحابى .. لو الكرسى الى قاعد عليه نطق يبقى هو ح ينطق ..

الأم : يعنى اصحابك الى صلاة النبى قوى ..

صابر : ما لهم .. رجالة ، ما فيهمش حد بيغرق فى شبر فيه ..

الأم : أنا مش عارفه أنت طالع مين ..

الأب : لا بوه ..

صابر : ولخالى يا بابا .. أيه اخباره يا ماما ..

الأم : (بأسى) علمى علمك ، اكثر من سنة ما شفتوش ..

صابر : آه صحيح ، ده فيه مقاطعة عائلية ، على كل حال باعت لكم السلام ..

الأم : شفته فين ؟

صابر : عديت عليه يوم ما نزلت ، المهم ، ايه أخبار الناس التانيين ؟

الأم : ناس مين ؟

صابر : ولاد عمك يا ماما ..

الأم : اسكت (تبتسم) مش ابن عمى طلع الحج هوه واخته ..

صابر : طبعاً رحتوا باركتوا لهم ..

الأب : احنا نقدر نتأخر .. كنا رحنا فى سين وجيم ؟ ..

الأم : (تغطى عليه) ولدكتور عزيز ففتح عيادة ثانية جنب بيتهم ، فى مصر الجديدة ..

صابر : (يضحك) هيه لسه اسمها مصر الجديدة ..

الأم : صابر ، بطل تريقه .. ده بدل ما تروح تسلم عليهم وتبارك لهم ..

صابر : وأنا من امتى باروح هناك ؟ فيه أكثر من انى محاضرتش

كتب كتاب هند أما عملتوه هناك ..

الأم : أنا مش عارفه بنكرهم ليه ..

صابر : عايزه الحق ولا ابن عمه ..

الأم : الحق طبعا ..

صابر : لأنهم جنوا علينا ..

الأب : (يشير بيده علامة الاستحسان) خف شوية يا صابر ..

صابر : مافيش حد أخف منى يا بابا ..

الأم : بالعكس .. أنت كل ما بتكبر دمك بيتقل .. جنوا عليك فى

ايه ..

صابر : أنا .. الحمد لله ، أنا الى نفدت بجلدى .. لا بصيت ،

ولا اتشبهت ، ولا قلدت (يضع كوب الشاي) اللهم ديمها

نعمة يا رب ..

الأم : ياريتك كنت بصيت لهم ، وقلدتهم ..

صابر : ليه .. هو أنا عاطل ، أنا معايا دبلوم صناعى ، وعندى

نص ورشة تسوى خمسين ألف جنيه ، ومستوره والحمد لله ..

الأم : بدمتك مش مكسوف ..

صابر : من ايه ..

الأم : اخواتك كلهم اتخرجوا من الجامعة وأنت ..

صابر : (يقاطعها) دول بقى الديكور بتاعى ، أنت عارفه الورد ..

شهادتهم بقى شوية الورق الى حوالين الورد ..

(يلقى جرس الباب ، يقوم اليه ويفتحه)

امينة : (تدخل) صباح الخير يا صابر (تضع حملها جانباً)

صابر : صباح الخير يا أجمل أخت في الدنيا ..
الأب : أوعى تكونى نسيتمى شوربة الخضار ..
أمينة : دى أول حاجة اشتريتها يا بابا ..
الأب : أنت عارفه معدة عمك مش مستحمله ..
صابر : جيتى ايه للغدا ..
الأم : أنت لسه فطرت لما ح تدور على الغدا ..
صابر : اطمئن ، والا أتغدى برة ..
أمينة : اطمئن ، ح أعمل لك محشى ..
صابر : الله .. الله (ينهض ويقبلها فى جبهتها) كده تستحقى
بوسه ..
الأم : واخواتك ح تعملى لهم ايه ..
أمينة : كباب حلة ، ومكرونة فى الفرن ، على فكرة يا بابا ..
الأب : أيوه يا أمينة ..
أمينة : الأستاذ كرم عاوز يقابل حضرتك ..
الأب : الأستاذ كرم ..
أمينة : قائلنى وانا داخلة .. وطلب يقابلك ..
الأب : دلوقتى ..
أمينة : أيوه ..
الأب : طيب .. خليه يتفضل ..
صابر : خليك انت يا أمينة .. (يخرج من باب الشقة ، ويسمع
صوته) اتفضل يا أستاذ كرم .. اتفضل .. (يدخلان) ..

كرم : (شاب فى حوالى الثلاثين من عمره ، يصافح الأب والأم)

ازيك يا عمى .. ازيك يا ست أم منير ..

الأب : أهلا وسهلا .. اتفضل يا ابنى .. اقعد ..

كرم : (يجلس) لمؤاخذه يا عمى .. ليكون الوقت مش مناسب ..

صاير : يا راجل .. احنا يقينا الظهر .. (يجلس)

الأب : الشاى يا أمينة ..

أمينة : حاضر يا بابا ..

الأم : (تنهض متناقلة) عن اذنكم ..

كرم : اتفضلى ..

(الأم تأخذ حقيبة الحضر ، وتدخل وراء أمينة الى المطبخ)

الحقيقة يا عمى .. أنا جاي فى موضوع ، أرجو ان ربنا يوفقنى فيه ..

الأب : خير يا ابنى ان شاء الله ..

كرم : حضرتك عارف انى من الزقازيق ..

الأب : ايوه ..

كرم : وعندى أشغالى هناك ، وكنت قاعد هنا لغاية ما أخلص

تعليمى .. انا أسرته مستورة والحمد لله ، عندنا ارض

بنزرعها ، وعندنا منحل ، وشونه .. يعنى الشهادة بالنسبة

لى ولا حاجة ، لكن خدتها برضه .. تعرف خدتها ليه

يا عمى ؟

الأب : لا ..

كرم : عشان أما ربنا ياذن ، واتقدم لناس طيبين زى حضراتكم ،

أبقى مالى مركزى ..

الأب : مضبوط يا ابنى ..
كرم : وآهو ربنا أذن ، وطمعان فى طلب ايد بنت حضرتك ..
الأب : ايد مين يا ابنى ..
كرم : الآنسة علا ..
الأب : علا .. بس دى لسه فى الجامعة ..
كرم : وماله ياعمى .. انا ماليش اى تحفظات .. انا لحقيقة عايز
افخر بالشرف ده ، واهى فرصة والدكتور منير هنا والأستاذ
صابر ، والأستاذ عمرو ، يعنى ..
الأب : أيوه ، بس ..
كرم : حضرتك عارف انى ساكن فى البيت من ست سنين ، سمعت
عنى حاجة ..
صابر : أنت من الشباب الى انا باحترمه يا أستاذ كرم .. صحيح
رغم أننا فى بيت واحد ما قعدناش مع بعض الا فى مناسبات
قليلة ، لكن ليه نظره بتقدر ، أنا واحد من اخواتها ما عنديش
أى مانع .
الأب : (يحدق صابر بنظرة غضب) مش أما ناخذ رأيها ..
كرم : طبعا .. طبعا يا عمى .. وممكن طبعا سألوا عنى .. أنا
ليه خال عايش فى الزيتون ، وخال تانى عايش فى العمرانية
اصل والدتى من هنا ، والدى واعمامى كلهم فى الزقازيق ..
وليه اخ اكبر منى متجوز وأخت اصغر منى متجوزه فم
الزقازيق برضة .
الأب : أحسن ناس يا ابنى .. والى فيه الخير يقدمه ربنا ..
صابر : و حضرتك واخدايه ..

كرم : حقوق ..

صابر : مش ناوى تشتغل محامى ..

كرم : شوف يا أستاذ صابر .. زمان كانوا بيسموا الحقوق كلية
الوزرا .. طبعا لأن السياسة لكبار كان أغلبهم حقوق ..

صابر : أيوه ، سعد زغلول ، ومصطفى كامل ، ومحمد فريد ..
كرم : لكن دلوقتى ، الحياة مابقتش شهادات ، فيه ناس بعرقها
وكفاحها عايشه احسن من كثير معاهم شهادات ..

الأب : على العموم .. كل واحد بياخد نصيبه ..

أمينة : (تحضر صينية الشاي ، تضعها على المصعدة) تفضلوا ..

صابر : (يوزع الأكواب) على فكرة ، أنا الوحيد فى اخواتى الى
مش جامعى .. انا واخذ دبلوم صنايع ، وعندى نص ورشه
ومجنند فى الجيش ، وطبعا تعرف اخويا الدكتور منير ،
وحسين معلمين عليا ، وعمرو هندسة ، واختى أمينة زراعة ،
وعلا فى التجارة ..

كرم : أنعم وأكرم ، لكن قبل كل دول أصلكم الطبيب ، والأدب
والكمال ، الى من الصعب تلاقيهم النهاردة ، عشان كده أنا
اتقدمت وعشمتى كبير ..

صابر : زى ما قال بابا .. رأيها فوق كل اعتبار ..

كرم : طبعا .. طبعا .. وعشان تكون الصورة واضحة ، احسنا
ح نعيش فى الزقازيق ، طبعا مصالحى كلها هناك ..

صابر : أنت عارف يا أستاذ كرم ، الحياة بعيد عن العاصمة نعمة
.. لكن نعمل ايه ، اتزرعنا فيها وخلاص ، قرف الحياة هنا
بقى فى الدم ..

الأب : كل واحد بيتأثر ببيئته .. ياما قالوا لي في المصلحة اترقي وانتقل رفضت كل الترقيات ، ما كنتش اقدر اعمل غير كده .. الاولاد كلهم في المدارس ، انتقل اروح فين ..

كرم : الظروف بتحكم ..

الأب : والحمد لله .. ادينا رسالتنا علي قد ما نقدر ..

كرم : (يضع كوب الشاي) متشكر .. اجي لحضرتك امتي اء. ف الرأي ..

الأب : أنا ح ابعت لك تشرفنا ، داجنا جيران ..

كرم : ربنا يديم المعروف .. أستاذن أنا ..

الأب : (يصفحه) مع السلامة ..

صابر : (يودعه حتى الباب) مع السلامة يا أستاذ كرم ..
(يخرج كرم ، يعود صابر ويجلس ، تخرج الأم وتجلس وأمينة تقف بجوار صابر) ..

الأم : خير يا أبو منير ..

الأب : ما انت سمعت كل حاجة ..

الأم : أقصد رأيك أيه ..

الأب : شوف رأي بنتك الأول ..

صابر : أنا موافق ..

أمينة : وانا موافقه ..

الأب : زى ما تكونوا متفقين ، (للأم) وانت يا أم منير ..

الأم : أنا ، مش ح أقول لأ ، بس تكمل تعليمها الأول ..

صابر : والله هيه اللي تقرر .. خصوصا انه مش محتاج لشهادتها ..

الأم : أيوه .. بس الشهادة سلاح .. ومش معقول نوقفها في
نص المشوار ..

صابر : واذا هيه وقفت نفسها ..

الأم : لا .. ما حدش يشجعها على كده .. دى عقلها طايش ..
أمينة : اهتياك يا ماما .. دى اختي وانا حافظاها .. دى تتمنى
تتجوز النهارده قبل بكره ..

الأم : اشمعنى انتي .. جالك اتنين ورفضتى ..

أمينة : ما جاش الأوان ..

الأم : أهى حياتكم .. كل واحد ينام على الجنب الى يريحه ..

صابر : ما كان من زمان ، كنت ارتحت وريحت ..

الأم : ولد .. الى يسمعك يقول اني تعبتكم كلكم ..

صابر : لا .. بس حظيتي الكل قدام اختيار صعب .. وانت حاطة
بدلة بابا الزرقاء على الشماعة قدام عنيينا وتقولى لنا ، الكراس
والكتاب قدامكم ، والبدلة الزرقا وراكم .. وطبعاً مين كان
فى سننا ويبيض للبدلة الزرقا .. أنا واحد من الناس كنت
با أحس انها عار ، وفى نفس الوقت أشوف بابا داخل لابسيها
بعد الظهر ، أقول لنفسي .. هوه حرام الواحد يطلع زى
أبوه ..

الأم : أنا ما قلتش حرام .. بس أبوك ما كانش قدامه فرصة ..

الأب : فعلاً .. إيامنا كانت المدارس للنزوات بس ..

الأم : أنا نفسي .. لو لقيت فرصة كنت كملت تعليمي ..

صابر : حلوه ، وما كنتيش طبعاً ح تتجوزى بابا ، وما كناش ..

الأم : انت يا واد مسخه .. نفسى تبقى رزين زى اخواتك ..

صابر : بدمتك .. حد بيعمل فى البيت ده هيضه غيرى ..

أهينة : ان جيت للحق لا ..

صابر : دنا بيتنهائي انكم وأنا مش موجود بتبقوا هس .. هس ..
لو الابرة وقعت تسمعوا رنتها ..

الأب : (سارجا) يا سلام .. والله وكبرتم يا اولاد ..

صابر : اتفضل يا ستى .. أهو بابا ناسى انه جد من كام سنه ..
الأب : (يردد) جد .. جد .. تصور انى لحد دلوقتى ماجانيش
الاحساس ده ..

صابر : شباب يا بابا .. لسه شباب ..

الأب : مش دى الحقيقة .. أنا جد .. يعنى عندى أحفاد ..

أهينة : أربعة ربنا يخل ، ويزيد ، ويمكن الخامس فى السكة ..

الأب : آمال هما فىن .. نفسى ألقاهم كلهم حواليه ، نفسى أقوم
الصباح على زعيقهم ، وعلى هيصتهم ، نفسى أقعد ويلفوا حواليه
ويقولوا جدو أهه .. جدو أهه ، (تنزف الدموع من عينيه)
نفسى الاعبهم ، والعب معاهم ..

الأم : حال الدنيا على كده ، كل واحد الدنيا لاهياه ..

الأب : لا ، لا ، يا أم منير .. مش حال الدنيا .. أفكار ولادنا هيه
الى غلط ، كل واحد عايز يبقى فوق ، فوق ، والى بيطلع
فوق ما يشفش تحت رجليه .. أيوه .. أخويا هلال عنده
حق ، نفسه يرجع بيته ، بيت العيلة ، وكل الناس تروح
تزوره فيه ، مش هامة ان ما حدش يخدمه ، ولكن همه ان
يجبرنا كلنا نروح له كل يوم .. ونقعد حواليه ..

أهينة : جرى ايه يا بابا .. احنا لسه كنا بنضحك ..

الأب : بنضحك ، وهو الضحك الأيام دى اسمه ضحك .. ده
اسمه بكا ، الضحك الحقيقي اننا نضحك كل يوم .. الضحك

الحقيقي ان يكون حوالينا أطفال ، تضحكننا عما يلهم وشقاوتهم
.. لكن هما فين ، أحفادي فين ..

الأم : جرى آيه يا أبو منير .. انت استكثرت علينا شوية الضحك
الى ضحكناهم ..

الآب : أبدا .. نفسى تضحكوا على طول .. نفسى نعمل طبليّة
مترين في مترين والا ثلاثة متر في ثلاثة متر ، ونقعد كلنا
حواليها ، نفسى أسمع هيصة كل يوم ، وزمبايطة كل ساعة .
الأم : يا أنويا ، دانت محرمننا نفتح البلكونة عشان هيصة العيال
في الشارع ..

الآب : مش ده السبب ..

أمينة : أمال آيه ..

صابر : خايف حد يعاكسك يا حلوة ..

الآب : لأ .. برضه مش ده السبب .. ياريت عيال الشارع بيعدوا
هيصة ويس ، لأ ، ده بيشتمو بعض شتمائم ما سمعناش
واحنا صغيرين ، سب دين .. وقباجه مالهش مثيل ، زى
ما يكون بيتعلموها في الكتب ..

صابر : بابا .. بابا ..

الآب : أيوه يا ابني ..

صابر : ح يبقى لنا فرع في الزقازيق ..

الآب : يالله .. ما هو الى بيتعزق عمره ما يتلم .. يمكن تكون
الزقازيق أقرب من الى جنبنا هنا ..

أمينة : انت بتقول فيها .

صابر : (يقطعها) الواحد ممكن يروح الزقازيق .. ويقعد يشرب

مهزلة عائلية - ٦٥

شأى ويتفدى .. والى هنا لسه ما وصلش السيدة زينب
أو الجيزة ..

الأم : دنا با أشوف المزار لما أروح أزور حد من أخواتي ..
صابر : وآل أيه .. مش عايز يقعد فى أسبوط .. مش يحمى
ربنا .. (يسمع صوت كلاكس سيارة)
أمينة : (وهى تهزول نحو حجرة أبيها) منير وصل ..
صابر : رايحه فىن يا بت ..

أمينة : (تقف بالباب) ح أبص عليه من البلكونة .. (يندق جرس
الباب ، تتجه نحوه) طيب .. طيب ..

الأب : تعالى هنا ، ماتقلقيش عمك ..
أمينة : (تغلق باب الحجرة وتتجه الى باب الشقة ، تفتحه ، يدخل
منير) ..

منير : السلام عليكم ..
صابر : (ينهض ويصافح منير) أهلا يا منير (بعد تردد يحتضنه)
حمد الله على السلامة ..

منير : (يربت على ظهر صابر) الله يسلمك يا صابر .. (يترك كل
منهما الآخر ويجلسان) عامل ايه فى الجيش ..

صابر : (يقف ويدق الأرض بكعبيه ويرفع يده بالتحية العسكرية)
كله تمام يا أفندم .. (يضحكون جميعا) ..

منير : ازيك يا بابا .. ازيك يا ماما ..
الأم والأب : الله يسلمك ..

الأم : جيت فى وقتك .. عايزه أوصل بيت عمك .. مآحدش من
ناحيتهم جه ..

منير : اطمنى .. انا عديت عليهم وانا جاى ..
الأم : صحيح ..
منير : ببسليموا عليكم ..
الأم : ماحدش منهم جه .. يعنى ماعرفوش انك جيت .. وخالتك
عامله ايه ..
منير : بتقول ، كانت عيانه ..
الأب : وعمك ازيه ..
منير : كويس .. ازيك يا صابر ..
صابر : كويس ..
منير : ورشتك عامله ايه فى غيابك ..
صابر : شغاله زى ما اكون فيها بالضبط ..
الأب : شريكه ابن حلال ..
منير : ما يمنعش انه يخلى باله .. ماحدش النهارده له امان ..
صابر : الدنيا فيها وفيها ..
منير : (يتطلع الى أمينة) ازيك يا أمينة ..
أمينة : تسلم يا أخويا .. تشرب شاي ..
منير : فيه حاجة ساقعه ..
الأم : ايوه ، هات لأخوك بببسى ..
(تهرع أمينة الى المطبخ)
الأب : مش تقوم تسلم على عمك اذا كان صاحى ..
منير : حاضر يا بابا .. أما استريح شويه .. ايه أخباركم ..
الأم : مافيش جديد ..

صابر : لا .. فيه

امیته : (تقدم له زجاجة البییس) اتفضل یا اییه ..

منیر : اذا كان حاجه بخصوصك مش عاوز اعرف ..

صابر : طبعا .. يروح فين الصعلوك جنب الملوك ..

منیر (ضاحكا) مش قصدى والله ، اقصد انك قد كل حاجه ، واكبر
من كل حاجه ..

صابر : كده يبقى براه ..

الاب : الموضوع بخصوص علا ..

منیر : مالها ..

الأم : جالها عريس ..

منیر : دلوقتي ، وانجامة .. ويطلع مين ده ..

صابر : الاستاذ كرم .. جارنا ..

منیر : العازب ، هو لسه ساكن هنا ..

صابر : (بنهكم) ايوه العازب ، ولسه ساكن هنا ، وهيه العازب
دى سبه ..

منیر : (مترددا) لا .. ما أقصدش .. أقصد هوه لسه ما اتجوزش ..

الاب : لسه من شويه كان هنا ، وطلب ايد أختك .. وح يعيش
فى الزقازيق ..

منیر : أيوه بس دى لازم تاخذ شهادتها ..

صابر : اذا كان هوه عنق شهادته على الحيط .. ده راجل مبسوط
مش محتاج ..

منیر : (لأبيه) ووافقت یا بابا ..

الأب : قلت ادينى فرصة آخذ رأيها ..
منير : رأيها ده ايه .. دى لسه صغيرة ..
صابر : دى سنها عشرين سنة ، يعنى كلها سنة و ..
منير : (بغيظ) اسكت انت .. اوعى تقول الكلام ده قدامها ..
 وتملا دماغها ..
صابر : انت لسه عايش فى الوهم بتاعك ده .. عيب على السنين
 اللى قضيتها بره ..
منير : شوفوا قلة الأدب ..
الأب : ولاد .. احترهوا وجودى .. والا أنا خلاص ما بقاليش
 كيان بينكم ..
منير : لمؤاخذه يا بابا .. صابر ده طول عمره بينرفزنى ..
صابر : معلش .. الصبح دايمًا ينرفز كل الناس .. على كل حال
 هيه صاحبة الرأي ، ورأيها لازم يمشى ..
منير : خلاص ياسى صابر .. خليك انت الكبير واقف لها ..
صابر : أنا قدها وقودود ، وما أبقاش صابر ان ما كنت أقوم بالواجب
 وأكثر ..
أمينة : ممكن أقول كلمة ..
 (يتطلعون اليها جميعا)
 اذا كنتم ح تآخذوا رأيها لازمته ايه ده كله ..
منير : بس اذا وافقت قبل ما تخلص الجامعة أنا مش موافق ..
الأب : لا يا منير يا ابنى .. هنا بقى مالكنش حق .. دى حياتها
 وهيه حرة ، وبعدين نحمد ربنا انه مش زهيل لها فى الجامعة ،
 والا واحد كده والا كده ..

منير : بتقول ايه يا بابا .. أنا عندى أخوات تعرف واحد كده
والا كده ...

صابر : زميلها يا أخى ..

منير : حتى وئو كان ..

صابر : تكونش عامل وزاها حرس ..

منير : لا طبعا .. لكن أنا وائق من أخواتى ..

صابر : خلاص . مافيش قضية . مادام هيه حافظت على الثقة دى

لازم احنا كمان نشق فى رأيها (يطرق منير برأسه الى الأرض

بينما يرفع صابر أصبعين من يده لأمانة علامة الانتصار) ..

اعمل لنا يا أمانة شوية ليمون ..

(لمنير) وفيه حاجة تانيه ..

منير : (يرفع رأسه) ايه يا سيدى ..

صابر : مش شايف ان الصالة كده منظرها بشع .. حاجاتك دى ..

ح تستنى كثير ..

الأم : جرى ايه يا صابر .. انت مش رايح الورشة ..

منير : استنتى ياماما .. الحاجات دى مضايكاك فى ايه ..

صابر : مش مضايقانى ولا حاجه .. بس ملفتة للنظر .. واحنا

مش ناقصين ..

الاب : أنا راخر عايز أقول كده .. خصوصا ان الناس داخله

خارجة .. الى جاى يسلم عليك يا منير . والى جاى يشوف

عملك من أصحابه .. وأهل الحنة . والقرايب ..

صابر : كنت با أقول نحطها فى المنور .. ونغطيها بمشمع ..

منير : ممكن .. بس على مهلك وانت بتنقلها ..

صابر : ما تخافش ..
الآب : (لمنير) مش تقوم تشوف عمك ..
منير : (يقف) حاضر يا بابا .. (يدخل الى حجرة الآب .. يغلق الباب وراءه)
صابر : بدمتك أنا غلطان يا بابا ..
الآب : لا يا ابني ..
الأم : وهو كان لازم تكلم أخوك بالطريقة دي ..
صابر : أجرى على الله ، ما ياخدوش من حد ..
منير : (يخرج من الحجرة مهرولا نحو باب الشقة)
الآب : (فى اضطراب) فيه ايه يا ابني ؟ فيه ايه ؟
منير : (ياتى صوته من الخارج) العيال كسروا الازاز ..
الآب : انزل يا صابر مع أخوك .. (يخرج صابر مسرعا)
الأم : (تخط صدرها) يالهوى ..
الآب : طبعاً .. أمله ونزلت الحقة ..
أمينة : (تخرج من المطبخ . تضع صينية الليمون) فيه ايه ؟ ..
الأم : حقة كلها شياطين .. يا ترى الازاز ده ح يكلفه كام ؟
أمينة : (تقدم الليمون لأبوها وأمها) روقوا ، روقوا .. حد قال له ييجى بيها لغاية البيت ..
الأم : يعنى يسببها بعيد عشان تتسرق ..
الآب : أنا عارف جابها ليه ، لازمته ايه .. اذا كان ح يقعد فى أسيوط ..

الأم : ده مش طايق يقعد هناك ..
(يدخل منير ويتبعه صابر) عملت ايه .
منير : والله الواحد زهق ..
صابر : (فى سخرية) انت لحقت ، امال ح تعيش ازاي ..
منير : كان لازم السكن ده يتغير من زمان ..
الأم : ياما غلبت أقول كده ، ولاد عمى أهم فى مصر الجديدة مستريحين .
صابر : (يندنن) تانى تانى تانى .. ح نعيد الماضى تانى ..
(يقف) أما البس هدومي وأخرج أحسن ..
الآب : ما تقعد معانا النهاردة ..
صابر : ماتنساش يا دكتور .. تبقى تروح تسلم عليهم .. طبعاً يهيمك رضاهم .
منير : أما أفضى ..
صابر : الله داحنا اتغيرنا بقه ، دنا افتكرت انك نزلت عليهم من المطار .. ولا نسيت ؟
منير : نسيت ايه ؟
صابر : مش دول مثلك الأعلى ..
الأم : أخوك الدكتور مشغول لشوشته ..
صابر : (يهز رأسه) آه .. دلوقتي بس بقينا مشغولين ، ولا منتظر انهم ييجوا يسلموا عليك هنا ..
منير : مش مبالغة منك ، أنا فعلاً منتظرهم ..
الآب : (مندهشاً) أنا مش فاهم بتتكلموا عن ايه .

صابر : مافيش داعى تفهم يا بابا .. الدكتور عايز يضرب عصفورين
بحجر ..

منير : يعنى ايه ياسيدى ..

صابر : العفو يا دكتور .. انا سيد نفسى بس .. لا أقبل حد يكون
سيدى ولا آكون سيد حد ..

منير : طيب فهمنى قصدك ايه ؟

صابر : ما انت عارف قصدى .. زمان كان اى حاجه تحصل هناك
تجرى وتجرى ماما معاك .. وبابا .. وهما كل حين أما ييجوا
مرة .. دلوقتى لازم هما الى ييجوا .. مش كده برضه ..
أمينة : (تقطع المناقشة) المهم دلوقتى يامنير .. ح تعمل ايه فى
الازاز الى انكسر ..

منير : ح أركب غيره وأمرى لله (لصابر) ايوه ياسيدى .. ايه
حكاية ضرب عصفورين بحجر ..

صابر : ما تدقش ، فوت .. عن اذتكم (يتجه الى الغرفة)

منير : (ضاربا كفيه) ساعة الجد يهرب ..

الأم : خلصتى الاكل يا أمينة ..

أمينة : على النار يا ماما ..

منير : أنا با أنبه عليكم .. ما حدش يكلم علا فى حاجة خالص ،
أنا بس الى ح أتكلم معاها ..

صابر : (يخرج وهو يهندم ملابسه) طبعا يا دكتور ، انت الكبير
ولك أولوية ..

منير : انت بالذات اخلع نفسك ، وتكون آخر واحد يقول رأيه ..
مفهوم ..

صابر : على عيني وراسي .. اى أوامر تانيه ..

منير : أنا حذرتك وخلص ..

صابر : (بضيق) حذرتنى .. حذرتنى يعنى ايه .. بأقولك ايه ..
انت دلوقت راجل .. ولك مسئولياتك بره البيت ده شوف
حالك أحسن .. وسبيبتنا نشوف حالنا ..

منير : انت بتتجرا و ..

صابر : (يقاطعه) اتجرا ونص .. أنا الكبير دلوقتى فى البيت .
لازم تعرف كده .. انت كلها ساعة وح تمشى . ممكن
ما حشدش يشوفك الا كل حين وحين .. ما حشدش حاسس
بالبيت ده غيرى ، فاهم يا دكتور ..

الأم : لم لسانك يا صابر . مافيش داعى للغلط ...

صابر : أنا مش غلطان ، أربع سنين أنا متحمل هموم البيت ده ،
وقبلها كام سنة قضاها فى السعودية ، يعنى من سنين
طويلة .. ما يعرفش عننا حاجة الا الى بنكتبه احنا فى
الجوابات .. عمرو اتجوز ، وحسين اتجوز ، وهند يدوب
حضر دخلتها ، مين تعب وشقى معاهم ، انت كل يومين تعبانة ،
وبابا عمل عملية ، مين عاش الهم ده . دنا بأبقى فى الجيش
وأعصابى كلها مشدودة لكم .. بعد ده كله جاى يأمر
ويحذر .. فوق يا أستاذ ..

الأب : مش كده يا صابر .. ده برضه أخوك الكبير ..

منير : يمكن الزمن كبيره ، وصغرنى ..

صابر : كان زمان ، دلوقتى كل واحد كبير نفسه ..

منير : (بغضب) لا .. أنا كبير عليك وعلى اخواتك كلهم ..
ماتنساش ان فلوسى برضه الى كبرتكم ..

صابر : كنت عارف انك ح تقولها .. (لايه وأمه) سامعين ..

الأم : وحده ينكر ..

صابر : الحمد لله ، انا الوحيد اللي كبرت من جيبى ..

منير : أنا لسه برضه الكبير هنا .. رضيت أو رفضت ..

صابر : خلاص ، احنا فيها ، اثبت بالفعل مش بالكلام .. ورينى ..

منير : أوريك ايه ، علا مش ح تتجوز الا لما تخلص تعليمها ..

صابر : سيبك من علا ، حل مشكلة عمرو .. ولا حسين ..

منير : دول رجاله ، كل واحد يحل مشكلته بالطريقه اللي تريده ..

(بتحدى) ساعدهم انت يا فالح ..

صابر : أنا فعلا ح أساعدهم .. (يخرج حافظه نقوده ، ويخرج

مبلغا من المال) خدى يا ماما .. موضوع حسين خلص ،

وموضوع عمرو قريب ان شاء الله ..

الأم : (بلهفة) صحيح يا صابر ..

صابر : صحيح يا ماما .. انا اتفقت مع سمسار ، وح اقباله بعد

شويه ..

الاب : فيك الخير يا ابنى ..

منير : (يقف مكفهر الوجه) أفكر أنا ماليش لزوم دلوقتى (يتجه

نحو الباب) ..

الأم : منير .. (تحاول النهوض) استنى .. رايح فين (يجذب

الباب وراءه بشدة) منير .. منير ..

صابر : (لأمه) اقعلى يا ماما .. ده ما صليق ..

الأم : أخوك خرج زعلان ..

صابر : زعله لا يقدم ولا يأخر ..

الأم : عاجبك كده يا أبو منير ..
الأب : خليك بره الموضوع .. هما اخوات مع بعض ..
الأم : وانا أهمهم ..
الأب : ما هماش صغيرين ..
صابر : ما تخافيش يا ماما .. أنا كنت بأفوقه ، لازم يفهم ان احنا كبيرنا .. وان أسلوب الأوامر بتاع زمان انتهى ..
الأم : زعلتنى منك يا صابر ..
صابر : أنا يا ماما .. (يحاول اضحاكها) تحبى أزعلك بصحيح .
الأم : أكثر من كده ، ح تعمل فيه ايه ؟ ..
صابر : (يخطف من يدها النقود) خلاص ، على رأى الدكتور كل واحد يحل مشكلته ..
الأم : اخص عليك يا صابر .. هات اعمل معروف ..
صابر : لا ..
الأم : ح ترجع فى كلامك زى العيال (تضحك) .
صابر : ولو على رقبتي (يعطيها النقود) خذى .. عوضى على الله .
الأب : يحميك ربنا يا ابني ..
صابر : تسلم يا بابا .. ياللا يا أمينة .. أنت سارحه فى ايه .
أمينة : ولا حاجه ..
صابر : قومي ساعدينى ننقل البلاوى دى فى المنور ..
الأم : مش اما ترجع ..
صابر : لا .. دلوقتى ، امال ح نعمل خطوبة علا فين ؟

الأم : (فى صوت واحد) خطوبة علا ..
أمينة : (فى صوت واحد) خطوبة علا ..

الأب : احنا لسه عرفنا رأيها ..

صابر : أنا عارفه .. وان شاء الله ح تتم الخطوبة ..
(يبدأ فى رفع الصناديق ، أمينة تساعده)

« ستار »

الفصل الرابع

(نفس المكان .. بعد مضي شهرين على أحداث الفصل الثالث .. الوقت السادسة مساء يوم جمعة .. الأب والأم وأميئة وعلا ، يغتم على البيت سحابة حزن لوفاة العم هلال) ..

الأب : (يروح ويجيئ في الصلاة ، متكئا عن عصا لها رأس نصف دائري من العاج) يا أميئة ، رضى يا بنتى كراسى على قدنا .. شوفى العدد كام ..

أميئة : كام يا بابا ؟

الأم : مش عارفه إيه الى انت ناوى عليه ؟

علا : اجتماع عائلى يا ماما ..

الأب : احنا كده أربعة ، وصابر ، خمسة ، ومنير ومراته ، وحسين ومراته .. وعمرو ومراته ستة ، يبقى حداشر ، وهند وجوزها يبقى تلتاشر (بعد الكراسى الموجودة) ثمانية ، وثلاثة يفعلوا على الكنبه يبقى حداشر ، هاتى كرسيين ، خليفهم ثلاثة يبقى فيه واحد احتياطى ..

علا : وكرم ، نسيته يا بابا ..

الأب : لا .. دا لسه على البر ..

الأم : ما هو بقى واحد من العيلة ..

الأب : لا .. الاجتماع ده عشان الى غرقوا ، وغرقونا معايم ..

أمينة : (تحضر الكراسى) حاجة تانية يا بابا ..

الأب : صابر ح يرجع امتى ؟

علا : فى ميعاد الاجتماع ..

الأم : بس لو تفهمنى ؟ ..

الأب : أفهمك ايه ؟

الأب : (يضرب أحد الكراسى بالعصا) انت شايقه العصاية دى

يا علا ياماً انضربت بيها انا واخوانى ، عشان كده فلحنا ..

الأم : الضرب ده كان زمان .. ده حتى بطلوه فى المدارس ..

الأب : عشان كده مابقاش فيه تربيته ..

الأم : طيب اقعد ، ريج نفسك ..

أمينة : اعمل لك ليمون يا بابا ..

الأب : لا .. قهوه سادة ..

الأم : (بدهشة) دا انت عمرك ما شربتها الا للضرورة ..

الأب : هو فيه ضرورة أكثر من كده ، النهارده ح يتقرر مصير

العيله كلها ..

الأم : مصير ايه ؟

الأب : العيله كلها . ولا فإكرانى ح أموت من غير ترتيب .. النهارده

قراراتى هيه الى ح تمشى ، والى مش ح ينفذها (يرفع العصا

عاليا) ح يعرف ان الله حق ..

علا : (بصوت جانبي) يبقى فيه ضرب ..

الأم : (تردد) ضرب .. ضرب .. مش معقول ، دول ولادك

رجال .. والمثل بيقول ان كبر ابنك خاويه ..

الأب : دا اذا كان عاقل ؟

الأم : وهم ولادك مجانين .

الأب : أيوه ..

الأم : لا .. وامت ناوى تعمل ثورة غضب وقطيعه فى العيله ..

الأب : ثورة آه ، لكن غضب وقطيعه لا .. موت أخويا هلال فوقنى
لماجات كثيره . كنت عارفها آه .. أيوه .. لكنى كنت
مطمنش ، أقول لنفسي بكرة يعقلوا ، ويرفوا مصلحتهم فين ،
لكن بعد السنين دى كلها ظهر ان ما فيش فايده .. واني
لازم أقول كلمتى قبل ما أموت .. ولازم أحطهم على أول
السلم ..

الأم : سلم إيه الى جاي تقول عليه ..

الأب : سلم العيله بمفهومها الى عرفناه ، واتربينا عليه ، سلم الحياة
الهادية من غير مشاكل ، وغم ونكد ، سلم القفه أم ودنين
يشيلوها اثنين وثلاثة وأربعة ، السلم الى كل الناس تاهت
عنه ..

أمينة : مشاكل الحياة أكبر يا بابا ..

الأب : لنفرض ، نقوم نستسلم لها ، عشان تركبنا أكثر ، المصيبة
جات من هنا ، استسلمنا مره ، وبقي كل شىء نستسلم له ..
لحد ما الحياة وقفت .. وكل واحد بيدور حوالين نفسه ..

علا : تمام ، زى الكلام الى بنقراه ونسمعه كل يوم ..

الأم : وهو حد عمل بيه ..

الأب : دى أول خطوة فى السلم .. ودى الى أنا مصمم أبدأها قبل
ما أموت .. نفسى أموت وبالى مستريح .

أهينة : المشاكل بقت زى الحصو فى المعدة يا بابا .. لازم عملية
جراحية عشان تخرج من الناس ..

أب : أبداً بنفسك ، لازم كل واحد يبدأ بنفسه ، وقدامنا مثل
ح نروح بعيد ليه ؟

الأم : ما كانش حد غلب .. آل مثل آل ..

الأب : أهو اليأس ده الى مخلينا نغمض عينا .. صابر ابنى وابنك
.. الكل ببص له على انه حمقى ، وأنه ما بيعتمش بحاجة ،
لكن الحقيقة غير كده خالص ، صابر ده عقله يوزن بلد ..
.. ما تعلمش ثقافته من الكتب .. كل حاجة بيقف قدامها ويفكر
فيها .. انت عارفه ولادك نجحوا فى دراستهم ازاي
يا هانم ؟ ..

الأم : ذاكروا ، اجتهدوا نجحوا .. لكل مجتهد نصيب ..

الأب : آه .. ذاكروا ، اجتهدوا نجحوا .. دى المشكلة .. الحقيقة
انهم كانوا بيحفظوا الكتب من المدة للمدة من غير فهم ..
من غير تفكير ..

الأم : غلط طبعا .. فيه حد ما يفكرش ، دا أصغر عيل النهارده
بيفكر .. (تضحك) الواد خالد ، دكى النهار ، قاعد حاطط
ايدته على خده ، بأسأله مالك يا حبيبى ؟ تفتكروا قال ايه ؟
أهينة وعلا : ايه ؟

الأم : قال بأفكر فى نفسى ..

(يضحكون جميعا ما عدا الأب)

أهينة : كل الجيل الجديد شياطين ..

الأم : وأبوك فاكر انه يقدر يحكم اخواتك النهارده ، بعد ما كبروا ..
ويقوا رجاله ..

الأب : (متضايقا) أنا الأب برضه ، وليه كلمتى .. والى مايجترمش
كلمتى يورينى عرض كتافه ، وان مت مايشيش فى جنازتى .
ولا يعرف مكان تربتى ..

الأم : انت فاكرا ح تغير الكون :
الأب : كلامك ده اللى مخوفنى ، من فضلك ساعة ما انكلم دعهم
دا تفتحيش بقلك ..

الأم : ده حكم قراقوش بقى ..

الأب : أنا بانبه عليك وخلاص ، (يدق جرس الباب) فهدتى
(تهز رأسها) افتحى الباب يا أمينة ..

(تفتح أمينة الباب يدخل منير وزوجته وهند وزوجها .
يتبادلون جميعا التحايا)

حسان : (وهو يجلس) خير ان شاء الله ..

الأم : انتوا اتقابلتم فىن ؟

حسان : الدكتور الله يكرمه فات علينا ..

منير : من حسن الحظ انى لحقتهم قبل ما ينزلوا .. (لأبيه) آيه
حكاية التلغرافات دى ؟ ..

هند : احنا اتخطينا ، قلنا فيه حاجه بعد الشر ..

أمينة : (تقف) تشربوا ايه ..

الأب : (يجلس) اسمنى يا أمينة ، لما الباقين ييجوا .. (لمنير)
استقرت على ايه يا ابنى ..

منير : (فى أسى) نويت أهاجر .. مش قادر أعيش هنا ..

الأب : معاك حق ، ما هو انت مش حاسس بينا ..

منير : ازى يا بابا تقول كده ..

الآب : احساساتك واضحة ، يعنى احنا بقه نمرض ، نموت
ما فيش مشكله بالنسبة لك ..

منير : (بعد صمت) ما هى دى المعادلة الصعبة اللى بيقلوا عليها ،
الكل عايز ، وما فيش حد بيضحى ..

الآب : (يضرب صدره بيده) احنا نضحى يا ابنى ، نقضى حياتنا
كلها تضحية ..

الأم : دى رسالتنا يا أبو منير ..

الآب : (مفتاظا) رسالتنا نربى ، ونكبر ، ونجوز ، وما نلاقيش اللى
يوصلنا لنومتنا الأخيرة ..

منير : مين قال كده ؟

الآب : كلامك يا أستاذ قال كده .. تفكر يعنى ح يحنطونا أما
حضرتك تشرف ، ولا هرك ح تزور قبرنا وتترحم علينا ..

حسان : ربنا يديكوا طولة العمر يا عمى ..

الآب : طال ولا قصر رايجين .. رايجين ..

منير : وأنا اعمل ايه ، أعيش ازاي .. مش لاقى وظيفة تدبني
وضعى ..

الآب : مش لازم يا سيدى تبقى وزير بالديكتوراه بتاعتك ، اشتغل
أى وظيفة وان ما لقيتش وظيفة اشتغل بشهادة الجامعة ..

علا : انت مش عرضوا عليك وظيفة مدرس فى الجامعة ؟

منير : وايه يعنى مدرس .. ح أقبض كام جنيه ، وأكفى نفسى
ازاي ..

الآب : آمال المدرسين اللى زيك عايشين ازاي ..

منير : رتبوا حياتهم على كده ..

الأب : تعال على نفسك يا أخى ورتبها .. أنا أبوك ومحتاجك ..
تخلي بيته وأنا فى السن ده ؟ ..

حسان : والله كلامك هزنى يا عمى ..

منير : (مضطربا ، مترددا) يا جماعة .. يا جماعة ...
(يذق جرس الباب .. تهرع اليه أمينة ، يدخل عمرو
وزوجته ، يتبادلون التحايا) .

عمرو : (يجلس الى جوار أمه) ايه يا ماما ؟

الأم : انت كنت بايت فى امبارح ؟

عمرو : عند حماتى ، ليه ، فيه ايه ؟

الأب : مافيش يا عمرو .. حبيت بس تقعد مع بعض شويه ..
عمرو : تقوم تبعت لى تلفراف يا بابا ؟ ما أنا كنت ح آجى
لوحدى ..

الأب : عشان تجيب مراتك معاك ..

عمرو : وده سبب يخليك تزعجنا ، ده حماتى انشغلت وكانت
عايزه تيجى معانا ..

هدى : وقدرت أهديها ، قلت لها احنا ح نرجع على طول
ونطمئنها .. (يذق جرس الباب ، تفتح علا ، يدخل حسين
وزوجته وتبدو عليها أعراض حمل ، يتبادلون التحايا) .

حسين : (يشملهم جميعا بنظراته الحمد لله .. كلكم بخير ..
دنا ركبي سابت أما ليلي قدمت لى التلفراف)

الأب : لسه فيكم شويه خير .. اعملى لنا يا أمينة دور شاي ..

أمينة : (تتجه نحو المطبخ) حاضر يا بابا ..

الأب : (يقوم من مجلسه ، يتوكأ على العصا ، ويتمشى) طبعاً
كلكم عايزين تعرفوا أنا جمعتكم ليه ؟

الجميع : (يهزون الرؤوس وفى أصوات متباينة) طبعاً .. ليه ..
عمرو : ده الظاهر اجتماع مهم ..

الأب : انت يامنير ، بصفتك الكبير .. انت عندك كام سنه
دلوقتى ..

منير : داخل على الأربعين ..

الأب : يعنى الى فات أكثر من الى جاى ..

منير : الله اعلم

الأم : دى الأعمار ..

الأب : (يقاطعها ضارباً الأرض بطرف عصاه) أنا قلت ايه ..

الأم : (تضع يدها على فمها) سكتنا ..

الأب : أربعين سنه وعندك بيت ، وزوجة ..

منير : أيوه ..

الأب : وبكره يبقى عندك أولاد ..

منير : اذا أراد ربنا ..

الأب : تخيل بقه انك هاجرت ، وخلفت وعشت العيشه الى نفسك
فيها ، وجه جرى لك حاجة ، تفتكر مراتك ح تعمل ايه فى
الغربه ..

منير : بسيطه ، ح تاخذ بعضها والولاد وترجع ..

الأب : يعنى مش ح تعرف تعيش بره ..

منير : لآ طبعاً .. دى مش ح تشتغل ..

الأب : يعنى الى ح يجيبه البحر ، ح تاخده التربة ٠٠ (لزوجة منير) وانت ياسيده ٠٠ ايه رأيك ٠٠

سببده : والله أنا غلبت معاه ياعمى ٠٠

الأب : يعنى معايا على الخط ٠٠

سببده : على طول ، داخلى ماما وبابا مش موافقين ٠٠

الأب : باختصار يا ابنى ، أنا عايز تستلم الوظيفة وتكيف حياتك على قدها ٠٠

منير : بس يابابا ٠٠

الأب : مش عايز بسببده ٠٠ هيه كلمه ٠٠ ياكده ٠٠ ياتفضل ، وانسى ان ليك أهل ، وماتورنيش وشك لغاية ما أموت ٠٠

منير : (متأثرا) يابابا انت بتطلب منى الصعب ٠٠
(تدخل أمينة وتوزع عليهم أكواب الشاي ، وتأخذ مكانها)

الأب : هوه صعب دلوقتى ، بكره يتأكد لك انه كان سهل ، وكان صح ٠٠ خلاص ٠٠ قلت ايه ٠٠

منير : أنا ح أتعب قوى يابابا ٠٠٠

الأب : مش قد ما تعبنا احنا ٠٠

الأم : الحقيقة ولا واحد من ميه من تعبنا ٠٠

الأب : وانت ياسى حسين ٠٠

حسين : أمرك يابابا ٠٠

الأب : انت يا ابنى مش شغال ، ووعايش بقالك أكثر من سنه ٠٠

حسين : أيوه يابابا ٠٠

الأب : آمال عايز تسافر ليه ٠٠

حسين : زيادة الخير خيرين ..
 الأب : لا .. ده يبقى افتري .. ده يبقى جحود بالنعمة ..
 حسين : زمايلي كلهم سافروا ..
 الأب : آه .. يعنى بقت موضه ، ولازم تعمل زيهم ..
 حسين : مش دى الفكره .. الواحد برضه لازمه شوية حاجات ..
 الأب : (زاعقاً) الله الغنى عنها ياسيدى .. ما أدينا عايشين ،
 ماحسنناش بالحاجات دى .. ولا احنا مش ناس ..
 ليلي : بابا عنده حق يا حسين ..
 حسين : ليلي ..
 ليلي : ايه يا حسين .. احنا عايشين مبسوطين والحمد لله ..
 واللى ما نقدرش نجيبه السنه دى ح نجيبه السنه الجاية ..
 الأب : أنا عارف الى هسو عايزه ، وكلها حاجات .. تنعس
 ماتسعدش .. ايه يعنى ما تعيش عيشة أهلك ..
 حسين : يا بابا الحياة النهارده مطالبها كثيرة ..
 الأب : تخيل كده انك سافرت ، ومراتك ربنا يقومها بالسلامة
 ولت .. ح تعمل ايه ..
 حسين : ولا حاجة .. البركه فى ماما ومامتها ..
 الأب : خلاص .. الحياة جردتك من احساساتك ، ازاي يا أفندى
 ابنك يتولد وما تكنش أول من يشيله ؟ ازاي بدى أفهم ..
 ليلي : أنا حامله هم الحكاية دى ، بس أقول ايه ..
 الأب : ما فيش سفر .. مفهوم ..
 حسين : يا بابا ..

الأب : الى قلته لأخوك سمعته بودانك ٠٠ قلت ايه ؟
حسين : ح اقول ايه ٠٠
عمرو : الحمد لله ، انا لا مسافر ولا مهاجر ٠٠
الأب : انت بقه ياسى عمرو ، تشيل الغباوة الى فى دماغك ،
وتسمعنى كويس ٠٠
عمرو : (يضحك) جزمة ، وفى دماغى ٠٠
الأب : أيوه ٠٠ عمال تلف يمين وشمال ، وأديك مش لاقى حته
تلك وولادك تحت سقف واحد ٠٠
عمرو : هيه دى بس مشكلتى يا بابا ٠٠ عندك حل لها ؟
الأب : أيوه ٠٠
عمرو : الحقنى بيه الله يخليك ٠٠
الأب : وتنفذه ٠٠
عمرو : برقبتي ٠٠
الأب : لم حاجتك واقعد فى شقة عمك هلال ٠٠
عمرو : (مأخوذاً) شقة عمى ٠٠ بس دى فى حارة ، وحته بلدى
الأب : مش بأقول فى دماغك جزمه ٠٠
عمرو : يا بابا ٠٠
الأب : هيه كلمة ٠٠ نص البيت ده بتاعى ونصه بتاع عمك سالم ،
وأهو فاضى ٠٠ سيبك من النعرة الكدابة ، البيت الى
اتولدت فيه مافيهوش أسانسير ، والحته الى عشت فيها
بلدى ، أنا عارف ٠٠ ده جلدك ماتطلعش منه ٠٠ ايه
رأيك يا هدى ٠٠
هدى : أى حته يا عمى ٠٠ بس نستقر ٠٠

عمرو : وولادنا .. ومستقبلهم ..

الأب : ح يتربوا زى انتم ما اتربيتوا .. ولا انتم اتربيتوا
غلط ..

الأم : دنا أتجوزت أبوكم فى البيت ده ، ويادوب كنا واخدين
أوده واحدة ..

الأب : احكى لهم .. فكريهم يمكن يكونوا نسيوا ..

الأم : احكى ايه ولا ايه ..

الأب : أفكر كلامى واضح ، والى مش ح ينفذه لا ابنى ولا أعرفه

.. أنا عارف اللى جواكم دلوقتى .. ممكن واحد فيكم
يتمنى لى الموت النهاردة قبل بكره (همهمات احتجاج)
ده صحيح .. أنا مش ح أزعل .. وح آكون مبسوط ساعة
ما أقول عايز منير ألاقيه جنبى .. عايز نعشى يشيلوه ولادى
الى من دهمى ولحمى .. مش عايز الناس تقول يا عيني ،
مات واتنين من ولاده بيجروا ورا الفلوس بره ..

منير : يا بابا مش كده .. الأعمار بيد الله ، مايمكن أموت أنا قبلك

الأب : ح تندفن بره ومش ح أعرف قبرك فى .. يا ولاد انتم حته

منى .. يا ولاد احنا مرضنا وعجزنا من كتر شيل همكم ،
والمفروض ان كل اللى فى نعمه يصونها .. مايفترش
عليها .. احنا كنا فىن وبقينا فىن ، احنا كنا عايشين نلبس
طاقية ده لده ، كنا نمد ايدينا ونستلف عشان نربيكم
ونعلمكم ، ما كناش بنعرف من الاكل الا أرخص حاجة فى
السوق ، أكثر من ثلاثين سنه وأنا بألبس جلاية واحدة
وأداريها بالبالطو اليتيم اللى باشمه زى الوردية ، (يزداد
عليه التأثر وتتساقط دموعه) عمرنا ما شربنا الشاى ،
الا فى المناسبات وكنا نخليه عشان مذاكرتكم وسهركم ..

عمرنا ما فكرنا نزور حد عشان ماحدش يزورنا ، ويكلفنا
شاي وأكل ومكان يقعد فيه ، الصالة دى كانت دمسكر
عمل ، كل واحد واحد له ركن يذاكر فيه ، كنت أنا وأمكم
ننام بعد صلاة العشا عشان نوفر لكم جو هادى .. كل ده
عملناه عشانكم ، وانتم .. انتم ..

الأم : (تنهنه بالبكاء) لازم تفكرنا بالقلب اللى شغناه ..

الأب : ولادك نسيوه ..

حسان : أفكر يا عمى الكل ح ينفذ طلباتك ..

الأب : دى مش طلبات يا ابنى .. دا كله رجاء .. نفسى أموت
وولادى حواليه .. أنا .. أنا ..

هند : (باكية) انت سيد الكل ، وطلباتك أوامر ..

حسان : اسمعوا يا جماعة .. الحياة الحقيقية اننا نعيشها ونحس
بيها ، مين فينا ما بيجريش .. كلنا بنجرب ومن كتر الجرى
نسينا نفسنا ..

(يلقى جرس الباب .. تنهض أهينة)

الأم : استنى يا أهينة أما ننشف دموعنا أحسن يكون حد غريب
(يزداد بكاءها) ..

الأب : قومى يا أم منير ، خشى انت جره .. وانت ياهند ..
(يلقى الجرس مرة أخرى)

أهينة : دا لازم صابر ..

(الأم وهند تقفان خلف باب الحجره المواكب .. تفتح
أهينة الباب) ..

صابر : (يدخل) متجمعين عند النبى ..

حسان : جماعة ان شاء الله ..

الأم وهند : (تعودان) أهلا يا صابر ..
صابر : أهلا يا هند .. مالك ياسست الكل .. انت بتعيطى
ولا ايه ..
الأم : لا يا صابر ..
صابر : ايه ده ، كلكم مدمعين ليه ..
الأب : اقعد يا صابر .. أقعد يا ابنى ..
منير : حاجة تانى يا بابا ..
الأب : طلب واحد يا ابنى .. كل يوم جمعه تقضوه كلكم هنا ..
معانا .. من الصبح بدري .. ماحدش يفطر فى بيته ..
ح نحضر الفول ، والطعمية ، والسلطة ، ونقعد مع بعض
نفطر ، ونتفدى ..
الأم : وابقوا اتعشوا فى بيوتكم ..
صابر : والى فى الجيش يعمل ايه ..
الأب : كلها شويه وتخلص الجيش ..
الأب : خلاص يا ولاد .. اتفقنا ..
صابر : على ايه ، مش تفهمونى ..
الأب : ح تعرف كل حاجة بعدين ..
صابر : وليه مايكونش دلوقتى ..
الأب : (يلقى بمصاه الى جوار مقعده) دلوقتى عايزين نقرأ
القاتحة ..
(يبدءون جميعا فى تلاوة القاتحة ، ويسدل الستار)

انها حقاً مهزلة

بقلم : جلال العشري

فى تناولنا لآى كاتب جديد ، وبالذات لآى كاتب مسرحى ، لا بد لنا أن نتناوله من زاويتين أو من منظورين ، يكمل أحدهما الآخر ، على نحو يجعل من التناول رؤية بانورامية لموقع الكاتب وموضعه ، أو لمكانه ومكانته على خريطة الحركة المسرحية المعاصرة .

فإذا كان أدبنا المسرحى قد شب عن الطوق فى الستينات . وتحركت كتيبة باكيها من كتاب القصة القصيرة ، لكى تعسكر فى ساحة العطاء المسرحى ، ضاربة خيامها ، حارثة أرضها ، نائرة بذورها ، لكى تطرح الظل والشم فى أرض العطاء الجديد ، وكان ذلك العطاء هو الأدب المسرحى القومى الذى لا شبهة فى قوميته ولا شائبة .

الأدب الذى لا يقوم على التمصير والاقتباس ، ولا يعتمد على التقليد والاحتواء ، ولكنه ينهض على الخلق والابتكار ، متخذاً مادته من ظروف البيئة ، وخامته من أرض الواقع وشخصياته من فئات المجتمع ، بعد أن كان يعيش على فئات مائدة المسرح الأوروبى ، يلتقط طعامه من أيدي جورج فيردو ومارسيل بانيول ورينيه فوشوا ، وادموند روستان ، وجول رومان ، والفريد ديغيني ، وغيرهم من كتاب أوروبا البورجوازية !

وصحيح أن التيار الواقعي الجارف غمر كتاب مسرحنا في الستينات ، من أمثال نعمان عاشور ، وسعد الدين وهيبه ، والفريد فرج ، ويوسف ادريس ، ولطفى الحولى ، ومصطفى محمود ، ومحمود السعدنى ، ممن وطفوا الأدب لخدمة المجتمع ، وجندوا الكلمة لمشكلات الجماهير ، فانعطفوا الى الموضوع الجزئى والتعبير المباشر ، وجمدوا على أطر ثابتة وقوالب لا تتغير .

ولكن الصحيح :أقنيا أن الرعيل الثانى من كتاب مسرح الستينات ، عرف كيف يتحرر من أطر الواقعية الجامدة وقوالبها الثابتة ، لكى يفتح على التعبير الأوسع أفقا والأرحب مدى ، الذى لا يقف عند تخوم القصيدة الاجتماعية ، بل يتجاوزها الى آفاق الحياة الانسانية ، فالمسرح عنده لخدمة الحياة التى هى أشمل من المجتمع ، والالتزام هنا بقضايا الانسان ، لا بمشكلات الطبقة ، والطبقة الكادحة بوجه خاص .

هكذا كانت مسرحيات ميخائيل رومان ، ومحمود دياب ، وعلى سالم ، وشوقى عبد الحكيم ، وصالح مرسى ، وعبد الله الطوخى ، فضلا عن تيار المسرح الشعبى الفصيح عند صلاح عبد الصبور ، ومسرح شعير العامية عند نجيب سرور !

وقد نفاد زخارف الستينات الى شواطئ السبعينيات ، للتلقى بكوكبة جديدة من كتاب المسرح ، شكلت بالنسبة الى كتاب الجيل السابق ، اضافة فى الشكل ، واضاءة فى المضمون ، بعد أن عانت وعانقت دراما التحول الجذرى الحظير التى صيغت محاور حياتنا واصطبغت بها هذه المحاور ..

كانت قد اكنوت بنيران الهزيمة ، وتدنرت ببارود النكسة ، وتجرعت حرارة الانسحاب والقهقرى ، فلاذت بالصمت الأليم ، تلوك الشئ الحزين ، وتعتصر الوجع الدفين ، وتفتش فى أعماق

الذات ، وقيعان النفس ، عساها تجد صخرة اليقين التي ترتكن عليها ، وتنطلق من فوقها من جديد ..

ولم يكن عبور أكتوبر المجيد ، عام ١٩٧٣ ، سوى تلك الصخرة الناتئة وسط تيارات الأهواج ومساقط الحياة ، التي اعتصم بها كتاب ذلك الجيل ، منهم من وقف فوقها ناظرا وراءه في غضب ، يحاكم الماضى ويحاسبه ، منقبعا عن أسباب النكسة ودواعي الهزيمة ، محاولا استئصال نقاط الضعف . والاستبصار بمناط القوة ، ومنهم من وقف فوق ذات الصخرة ، متطلعا أمامه في أمل ، متجاوزا الأمس الحزين الى غد أكثر بهجة واشراقا للجميع .

وقد يتفق كتاب ذلك الجيل حول مقولة واحدة ، هي نشدان العدل والحرية ، العدل على المستوى الاجتماعى ، والحرية على المستوى الفردى ، بعد أن عانوا طويلا وعميقا من أهل الثقة الذين حكموا وتحكموا فى أهل الخبرة ، وبعد أن توجسوا قليلا ثم كثيرا من أهل الانفتاح ، وقد بدأوا يكشرون عن أنيابهم الجائعة الى التكنسب السريع ، ويفصحون عن نواياهم الظالمشة الى التربح المشروع وغير المشروع .

وتلك أزمة العدل وهذا هو مآزق الحرية !

وهما طرفا قوس الطيف المسرحى ، الذى تجاذب كتاب ذلك الجيل ، سواء منهم من كان على المستوى الأكاديمى ، كما فى حالة الدكتوراة الأربعة . . سمير سرحان وعبد العزيز حدودة ومحمد عنانى وفوزى فهمى ، أو من كان منهم على المستوى الجماهيرى مثل يسرى الجندى وأبو العلا السلاّمونى ورأفت الدويرى ولينين الرملى .

وقد نجد فى مسرح الدكتوراة الأربعة ملاحج من مسرح رشاد رشدى باعتبارهم من تلاميذه وأنصاره ، يتأثرون بشخصه ويدينون

بأدبه وفكره . على تفاوت في النسب واختلاف في المقادير ، وذلك على العكس من أفراد الفريق الآخر ، الذين لا يمكن نسبتهم الى كاتب معين أو رائد بالذات . وإن كنا نسمح في مسرح يسرى الجندي تأثرا بالفكر الأيديولوجي عند ألفريد فرج ، كما نلمس في مسرح أبو العلا السلاهموني انعطافا نحو الفكر السياسي عند محمود دياب ، أما مسرح لينين الرملي ففيه احتواء واضح لكوميديا النقد الاجتماعي عند سعد الدين وهبه ، على العكس من مسرح رأفت الدويري الذي تتردد فيه أصلا من دراما نجيب سرور الشعبية وتراجيديا صلاح عبد الصبور الميتافيزيقية !

على أنه إذا كانت الأجيال في تواصل ، وكان الوصال وليس الانفصال هو سمة أجيال الابداع المسرحي ، جيلا وراء جيل ، فإن جيل الثمانينات وإن تمتع برؤى جديدة وحساسية مغايرة ، إلا أنه في النهاية ، وربما منذ البداية ، استكمالا وليس استشكالا للجيل السابق عليه ، أو ما يسمى بجيل الحساسية التقليدية .

صحيح أن جيل الحساسية التقليدية ، لصيق بالواقع ، يريد أن ينقله ويعكسه ويثير مشكلاته ويطرح قضاياها ، على أساس أن هناك واقعا بالفعل ، يحرص على تفسيره أو تصويره أو تغييره ، ولذلك فهو يعتمد على قواعد ثابتة وأطر جاهزة ، هي قواعد المحاكاة الأرسطية في الاحالة الى الواقع .. الذاتي أو الاجتماعي .

ولكن الصحيح أيضا أن جيل الحساسية الجديدة ، أكثر حرصا على توسيع دلالة الواقع بحيث يشتمل على الحلم والشعر والأسطورة ، على نحو يمكنه من زعزعة الهيكل الاجتماعي ، ومداخلة المأثور اللغوي ، واقتحام مغاور الوعي أو اللاشعور ، وصولا الى ذلك البرزخ القائم بين الممكن والمستحيل !

وإذا كانت الحساسية الجديدة تقتضي أساليب وأشكالا جديدة ،

فنحن واجدوها فى فك العقيدة التقليدية وكسر رتابة الايقاع
السردى ، وتحطيم نمطية الفكر والأداء • ورفض النموذج البشرى
العادى الذى يرتبط بزمان ثابت أو مكان بالذات ، والانسحاب الى
الداخل ، تعلقا بأهداب الذات ، لا تحسسا للعاطفة المتنوعة ، أو
تحسبا للشجن الأليم •

ولا يعنى هذا مجرد ثورة الشكل على المضمون ، ولكنه بالأحرى
الثورة على الشكل التقليدى ، بحثا عن الشكل الأكثر حداثة ،
والاقدار على استيعاب المضمون الجديد •

ومن هنا تصبح الاحالة الى الواقع ، اقتحاما لنواقع نفسه ،
ومداومة لمقولاته الجامدة ومعطياته الجاهزة ، طرعا للأسئلة وليس
تقديما للأجوبة ، وافتراقا للمجهول • وليس رضى بالواقع ، وكسرا
لمحارة الممكن سعيا وراء لؤلؤة المستحيل !

وتلك هى المتعة الحقيقية فى الفن الجديد ، الذى لا يعترف
بالكسل الذهنى ، ولا يعرف الشجن العاطفى ، ولا يحرص على
الامتناع والموانسة ، ولكنه يستهدف القلق النفسى ، والأرق
الذهنى ، والمعاناة الحقيقية من أجل الحصول على « الفروة »
الذهبية التى جاءت فى الأساطير ، أو من أجل الوصول الى اللؤلؤة
ذات الأصداف السبع ، التى طلبت لب راكبي البحار ، وجوابى
الآفاق !

واذا كانت تلك الحساسية الجديدة هى الصبغة التى اصطبغ
بها أغلب كتاب جيل الثمانينات فى الشعر والرواية والقصة
القصيرة ، فقد صبغت بدورها أكثر كتاب المسرح •

وقد نميز من بينهم اسماعيل العادلى ، ومحمد سلماوى ،
وصلاح عبد السيد ، ونهاد جاد ، وجمال عبد المقصود ، وأمير

سلامة ، وسعيد سالم ، وعزت الأمير ، ولكننا لا نستطيع أن نفعل
هذا الكاتب المسرحي ... جمعة محمد جمعة ، صاحب هذه
المسرحية ... « مهزلة عائلية » .

فهذا أديب وفد الى دنيا المسرح ، بعد أن استوطن عالم
القصة القصيرة ، وأصدر مجموعة قصصية بعنوان « الأبيض
والأسود » فض فيها بكارته الأدبية وخرج منها حاملا في وليده
المسرحي الأول .

وإذا كان في قصصه القصيرة ، قد تجاوز مرحلة الحكاية
والسرد ، فضلا عن التتابع الزمني والترتيب المنطقي ، كما تجاوز
النموذج الانساني ذي الدلالة الواضحة ، والنزعات البشرية
ذات الغايات المحددة ، أعني إذا كان قد تجاوز الاتجاه المرباساني ،
بل حتى الاتجاه التشييكوفى ، الا أنه لم يصل بعد الى مشارف
التعبيرية القصصية ، أو التجريدية في كتابة القصة القصيرة !

وهذا الذى يقال فى مجموعته القصصية الأولى ، يقال مثله
فى مسرحيته الأولى ، أو فى عمله المسرحي الأول ، الذى تتداخل
فيه الحساسية التقليدية والحساسية الجديدة ، أو الواقعية التقليدية
والواقعية الجديدة .

وقد يبدو التكنيك التقليدى هو السائد على هذا العمل
المسرحي ، وقد يكون الابتعاد عن المغامرات الشكلية هو الواضح ،
ولكن العين الفاحصة ، سرعان ما ترى غير ما تراه النظرة العابرة ،
اذ ترى نوعا من تنقية الشكل التقليدى ، وتصفية المضمون
الواقعي ، وطرح رؤية اجتماعية جديدة ، فيها الرقة بدلا من
الدقة ، والصرامة بدلا من الضخامة ، والتلميح بدلا من التصريح ،
بحيث ينتقل العمل المسرحي ككل « نقلة كيفية » داخل هذا
الاتجاه الجديد .

وهو الاتجاه الذى لا يريد لنفسه أن يكون أدبا وإقعيما ،
مباشرا ، وانما يريد أن يمارس تقنيات حديثة متنوعة ، فيها
التريتر السياسى ، والتلميح الاجتماعى ، والتضمين الثقافى ،
دونما وقوع فى هوة الوعظ أو الارشاد أو المباشرة .

وفوق هذه الركائز المحورية ، يقوم بناء هذه المسرحية
« المهزلة العائلية » التى تذكرنا من ناحية بمسرحية « منزل القلوب
المحطمة » للكاتب الايرلندى ج . ب . شو كما تذكرنا من ناحية
أخرى بمسرحية « بستان الكرز » للكاتب الروسى انطون تشييكوف .

فهو يحدو حدو الكاتبين الكبيرين ، اذ يحشد فى مكان واحد
أفراد أسرة واحدة ، وهم يمرون بطرف تعس من ظروف الحياة ،
ثم يمضى بهم حتى يعبروا ذلك الطرف ، وتتضح أمامهم عتبات
الطريق .

واذا كان فارق ما بين الكاتبين الكبيرين شو وتشيكوف ،
هو أن شو كان يحشد أفكارا بينما تشيكوف كان يحشد أشخاصا
حقيقيين نذكرهم بذواتهم بينما ننسى أشخاصا شو ولا نذكر
الا أفكارهم ، فاننا نلاحظ مدى تأثير كاتب هذه المسرحية ،
بكلا الكاتبين ، مع ميل أكثر الى الكاتب الروسى انطون تشييكوف .

فهنا شخصيات دموية أكثر منها نمطية ، وعلاقات انسانية
أكثر منها آلية ، ومواقف خلقتها طبيعة الحياة ، ولم تشكلها
ظروف المسرح .

ولكن .. أين وقعت المهزلة العائلية ؟

لقد وقعت فى مصر ، مصر ما بعد العبور ، أو بالأحرى مصر
الانفتاح ، لأنه اذا كان العبور قد حقق أهدافه على المستوى

الحربى ، فلم يحقق الانفتاح الا عكس نتائجه على المستوى
الاقتصادى ، وكانما حقق العبور .. النصر ونقيض النصر ! .

وعلى ذلك ، فان « المهزلة العائلية » تيسست مهزلة أسرة
بعينها ، أو عائلة بالذات ، ولكنها مهزلة مصر ما بعد العبور ،
مهزلة الاغتراب داخل أرض الوطن ، والعزلة بين أبناء المجتمع ،
والوحدة بين أفراد الأسرة ، والوجود بين الكل ، دون الشعور
بأحد !

لقد أدى الأب رسالته فى الحياة ، بعد أن هدف هذه الحياة
لتربية أبنائه وتعليمهم ، والوصول بهم الى شاطئ الشهادة ،
وبر الوظيفة ، منير .. الابن الأكبر الذى يعمل بالخارج ، وحسين
الابن الأوسط الذى يبحث عن عمل باحدى الدول العربية ،
وعمرى الابن الأصغر ، الذى ضاعت شقيقته وليس أمامه سوى
العيش فى بيت أبيه ، أما صابر فهو الابن الوحيد الأعزب ،
الذى لم يكمل تعليمه الجامعى واتجه الى الصناعة ، يكسب منها
أضعاف ما يكسبه اخوته مجتمعين ، هذا بالإضافة الى هند الابنة
الكبرى المتزوجة ، وأمنية الابنة الوسطى التى لم تتزوج بعد ،
وعلا الطالبة بالجامعة ، والتى تقدم كرم ابن الجيران لخطوبتها
وهى لاتزال طالبة .

وفوق هذه الكتيبة من الأبناء .. بنين وبنات ، هناك هلال
شقيق الأب الأكبر ، الذى يعاني آلام المرض ، ويقوم فى بيت
أخيه ، وهناك من بعده سالم الشقيق الأصغر ، الذى يتردد على
بيت أخيه من حين الى حين ، فاذا أضفنا الى أولئك وهؤلاء جميعا ،
حسان زوج هند ، وليلي زوجة حسين ، وهدى زوجة عمرو ، وماهر
ابن هند وحسان ، لوجدنا أنفسنا أمام فيلق بشرى ، يتجمع فى
رقعة مكانية واحدة ، يجتر الهموم والأحزان ، ويأوك المتاعب

والآلام ، وينعى حظه فى الدنيا ونصيبه فى الحياة ، كل هذا فى بيت الحسرات ، أو فى منزل القلوب المحطمة !

لقد عاد منير الابن الأكبر من الخارج ، رافضا العودة الى شقيقه فى أسبوط ، محاولا نقل عمله الى القاهرة ، أو الهجرة تماما عن أرض الوطن ، وعاد عمرو الابن الأصغر الى بيت أبيه ، بعد أن راح ضحية النصب والاحتيال ، تنازل عن شقيقه لأحد أصدقائه ، على أمل أن يحصل على شقة أخرى جديدة ، فلا طال شقيقه القديمة ولا حصل على الشقة الجديدة ، أما الابن الأوسط حسين ، فلا حول له ولا قوة ، حتى يحصل على عمل بأحدى الدول العربية ، وكذلك الابن الأوسط الآخر صابر ، الذى اتجه الى الصناعة بدلا من التعليم ، والكسب الحر بدلا من الراتب الوظيفى ، ولكنه لا يزال مقيما فى بيت أبيه حتى تنتهى خدمته العسكرية فى الجيش .

لقد عشش الأبناء جميعا فى بيت الأسرة القديم ، بالإضافة الى أمينة وعلا ، وبالإضافة أيضا الى هلال شقيق الأب الأكبر الذى يعانى آلام المرض ، حتى لقد أصبح البيت أشبه بزقاق شديد الصخب أو حارة بالغة الزحام ، جعلت الأب يصرخ من الأعماق : « أنا مش عارف ايه الى جرى فى الدنيا ، الكل مسروع ، الكل ييجرى ، زى ما يكون كل واحد راكبه شيطان » .

ويضيق الأب بالكل ، فلا يملك الا أن يصرخ فى وجه الجميع : « ٠٠٠ آه ٠٠ المراكز ، زخره وديتنا فى داهية ، فلان بقى وكيل وزارة ، فلان بقى وزير ، فلان بقى ٠٠ وكله فى الآخر بيهد ايده ، الى بيهدا عشان ياكل ويلبس ويشرب ، والى بيهدا عشان يسرق ، والى بيهدا عشان ياخذ رشوة » .

وكانما الأب بهاتين الصرختين يلخص الوضع الداخلى فى

«البيت ، ويشخص الموقف الخارجى فى المجتمع ، هروب الى الداخل ، وفى الخارج فقدان الهدف والاتجاه ، وكأننا الكل فى ضياع ما بعده من ضياع !

لقد اختلفت موازين القوى فى المجتمع ، فما كان له انعكاسه وامتداده على محيط الأسرة ، فالتعليم لقيمة له ، والثقافة مضيعة للوقت ، والشهادة كأنما هي وصمة عار على صدر صاحبها ، فهاهم الموظفون والدكاترة من حملة الشهادات والمؤهلات ، لا يعرفون أو بالأحرى لا يقدرّون على حل مشكلاتهم ، التى لا تزيد على الحصول على شقة ، أو مأوى ، وهاهو صابر الابن الصانع أو الصنايعي ، الذى يقف على الطرف الآخر من سائر اخوته ، سواء فى الفكر أو فى السلوك ، هو الذى يدبر شئون البيت ، وهو الذى يتدخل لحل مشكلة أخته علا ، عندما يتقدم كرم للزواج من علا وهى لاتزال طالبة بالجامعة .

وكانما العقل المفكر يترك مكانه للمساعد المدبر ، بعد أن أفلس العلم والتعليم ، فى مجتمع البقاء فيه للأغنى ، والوجود فيه لمن يملك ، ولايهم بعد ذلك ان جاء المال والثراء عن طريق مشروع أو غير مشروع ، لأن من يملك يعرف بالتالى كيف يحكم أو على الأقل كيف يتحكم ، وتلك هي المأساة بل تلك هي المهزلة !

وهي ليست المهزلة العائلية وحدها ، ولكنها المهزلة الاجتماعية بوجه عام !

ولقد حاول الكاتب أن يعمق معنى البحث عن شقة ، أو الحصول على مسكن ، لأن الشقة تعنى المأوى ، والمسكن يعنى السكنية ، وهي أساس الاستقرار المادى ، والاستمرار المعنوى ، وهي أيضا عماد الأمن والانتماء ، لأنها بمفهوم الأصالة ، تعنى « بيت العائلة » الذى يلوذ به الجميع .

وهذا ما عبر عنه الأب بقوله وهو حزين : « الناس ما يقتش
تشوف الا تحت رجليها .. ما حدش بيص لقدام .. يعنى
أنا عشت عمرى كله ، وما فيش حاجة نفصت على عيشتى الا انى
ما قدرتش أعمل بيت لأولادى ، كانوا النهاردة فى غنى عن اللى
بيحصل ده ، لكن أعمل ايه ، الايد كانت قصيرة ، كل الدخيل كان
بينصرف على المدارس ، قلت لنفسي يمكن لما يكبروا ، يقدروا
يعملوا اللى أنا ما عملتوش ، لكن خاب ظنى .. كل واحد شرد
فى ناحية ، كل واحد شوره من دماغه » .

وهذا معناه أن العودة الى التقاليد لا الى التقليد ، هو الذى
يقيم التواصل بين الأجيال ، ويرسخ الانتماء بين أبناء الأسرة ،
ويؤكد مفهوم الأصالة الأسرية ، وكيف أنها القاعدة الصلبة التى
يرتفع فوقها تمثال الأصالة فى المجتمع .

واذا كانت هذه المسرحية تنتمى الى ما يعرف بدراما الأسرة ،
فإن أهم ما فيها هو احتشادها بمجموعة من الأفكار ، يؤدى بعضها
الى البعض الآخر ، بحيث تصطبغ جميعا بطابع السخرية الضاحكة
او الضحك الساخر ، الذى يصبه الكاتب على المجتمع ، وقد ربط
بين الظروف الاقتصادية ، والنتائج الأخلاقية ، وبين سياسة
الانفتاح وما ترتب عليها من آثار وأضرار .

واذا كانت هذه المسرحية بعد ذلك تنتمى الى الواقعية ، فإن
أهم ما فى واقعية هذا الكاتب ليس واقع الحياة نفسها ، ولكنها
واقعية أفكار تولدت فى ذهنه من مختلف الانطباعات ، التى تمثلها
واجترها حتى جسدها هذا التجسيد الساخر المضحك الذى
يجعلها غريبة على واقع الحياة ، وبعيدة عن هذا الواقع الذى
يعرفه الناس جميعا .

وعلى ذلك فإن شخصيات هذه المسرحية ليست شخصيات

واقعية كسائر الشخصيات التي نعرفها في مسرحيات غيره من الكتاب الواقعيين ، ولكنها « دمي » من صنع يديه ، خلقها ثم قذف بها على سطح الورق ، تمهيدا لطرحها فوق خشبة المسرح ، بحيث يؤدي كل منها الدور الذي تمثله ذهن الكاتب .

وهذا معناه أننا بازاء شخصيات صحيح أنها واقعية ، ولكن الصحيح أيضا أنها لا تمثل الا نفسها ، لأنها شخصيات من خلق الكاتب ، تولدت عن أفكاره ، وعن وجهة نظره في الناس والأشياء . ومن هنا مصدر السخرية والضحك ، عند المؤلف ، الذي يتكلم بلسانه هو على ألسنة هذه الشخصيات جميعا !

ولهذا كان الصراع الدرامي في هذه المسرحية ، صراعا مريرا مضحكا ، لأنه صراع بين أفكار متعارضة وآراء متنافرة ، وليس صراعا بين شخصيات لكل منها هدفه الذي يريد أن يحققه ، مهما يكن من سبيل الى تحقيق هذا الهدف .

وقد جمعت المسرحية بين الكوميديا ، بل والمهزلة أحيانا ، وبين البساطة والرفقة الانسانية ، على نحو يصعب معه أن نغلب أحد الجانبين على الآخر فهاهو الأب يقول قرب نهاية المسرحية : « ياولاد أنتم حنة منى . . ياولاد احنا مرضنا وعجزنا من كثر شيل همكم ، والمفروض ان كل اللي فى نعمة يصونها . مايفترش عليها . . احنا كنا فىن وبقينا فىن ، احنا كنا عايشين نلبس طاقية ده لده ، كنا نمد أيدينا ونستلف عشان نربيكم ونعلمكم ، ماكناش بنعرف من الأكل الا أرخص حاجة فى السوق ، أكثر من ثلاثين سنة وأنا بلبس جلابية واحدة وأداريها بالبلطو اليتيم اللي باشمه زى الوردة » .

اننا نرى أشخاص المسرحية غارقين فى أحلام وهمية منعزلة عن الواقع ، عاجزين عن أى تصرف يخرجهم من الأزمة ، مكتفين

يسكب الدموع حزنا على شهاداتهم الجامعية ، التي لا تقدم حلا لآية مشكلة ، وان كانت لدى بعضهم مثل الأخ الأكبر الدكتور منير ، سببا في العديد من المشكلات !

وهذا معناه أن « المأساة الرهيبة » ليست مأساة على الإطلاق، ذلك لأن هؤلاء الأشخاص يفتقرون كليا إلى القدرة على الشعور الجدى بحركة الواقع والاحساس العميق بنبض المجتمع ، وتلك هى إحدى العناصر الكوميديّة الأساسية فى المسرحية !

وبيت العائلة فى المسرحية له أكثر من دلالة ، فهو أولا وقبل كل شيء يرمز إلى شاعرية الحياة القديمة ، كما أنه يرمز فى ذات الوقت إلى نهاية هذه الحياة ، وضرورة التطلع إلى المستقبل . بكل ما يحتمله هذا المستقبل من آمال وأحلام .

وهذا ما عبر عنه حسان زوج هند ، بقوله : « اسمعوا يا جماعة .. الحياة الحقيقية اننا نعيشها ونحس بها ، من فينا مايجريش .. كلنا بنجري ومن كثر الجري نسينا نفسنا » .

وقد نأخذ على المسرحية وقوعها فى أربعة فصول ، دونما مبرر على الإطلاق لهذا التقسيم الرباعى ، خاصة إذا علمنا أن الانتقال من فصل إلى الفصل الآخر ، لا يجرى وقتنا لتطور درامى أو ضرورة حتمية ، ولكن على أساس زمنى ، لا علاقة له بتطور مراحل الحدث .

وقد نأخذ أيضا على شخصيات المسرحية ، بعض الشخصيات المفحمة اقحاما مثل شخصية « العم هلال » شقيق الأب وعم الأولاد ، فوجوده غير مبرر فى المسرحية ولا يكاد يطور الحدث أو يكسبه دلالة بعينها أو عمقا بالذات ، كل ما نجح فيه هو أحدث شرخا عميقا فى الوحدة العضوية لأفراد تلك الأسرة الصغيرة .

على أن الأهم من هذا كله ، هو أن مسرحية « مهزلة عائلية »
تتناول الماضي والحاضر والمستقبل ، فبيت العائلة يرمز إلى
الماضي ، والشقة التي تنازل عنها عمرو في مقابل الشقة التي
لم يحصل عليها ، ترمز إلى الحاضر ، أما المستقبل فيرمز له
بالتثام شمل العائلة ، والعودة إلى قيم الماضي في ثوب آخر جديد :
هو الذي عبر عنه الأب بقوله : « لي طلب واحد يا ابني .. كل
يوم جمعة تقضوه كلكم هنا .. معانا .. من الصبح بدري ..
ماحدش يفطر في بيته .. ح نحضر الفول والطعمية والسلطة ،
ونقعده مع بعض نفطر ، ونتغدى » وتضيف الأم : « وابقوا اتعشوا
في بيوتكم ! » .

انه اذا لم يعد يبقى من الماضي سوى توديعه بحرارة ، بحرارة
لاتنبعث من التشبث به ، وانما من التحرق شوقا الى أن يتخلى
الماضي عن مكانه للمستقبل ، فان كاتب هذه المسرحية ، يؤمن
ايمانا واضحا بمجيء جيل آخر جديد ، أكثر انتماء الى المستقبل ،
جيل يظهر ماضيه ويكفر عنه ، ويحيل المستقبل بالعمل غير
العادي ، الى مدينة غناء ، انه جيل « صابر » الذي يؤمن بالأيدى
العاملة ، والسواعد المفتولة ، وقدرة الصنائية على إعادة صنع
الواقع .

وهذا في تقديرى هو المضمون الشعارى والعاطفى
والانسانى ، الذى ينساب فى ثنايا فصول هذه المسرحية ، التى
تفيض اشراقا بالغد ، واشعاعا ينبعث من ضوء القمر !

الغد المأمول ، وليس القمر المستحيل !

فهرس

٣	• • • • •	الأشخاص	١
٥	• • • • •	الفصل الأول	٢
٢١	• • • • •	الفصل الثاني	٣
٥١	• • • • •	الفصل الثالث	٤
٧٦	• • • • •	الفصل الرابع	٥
٩٣	• • • • •	الدراسة	٦

١

٢

صور من هذه السلسلة

- | | | |
|---|-----------|--------------------|
| ١ - شوارع تنام دن العاشرة | (قصص) | أحمد محمد حميده |
| ٢ - باب الريح | (قصص) | نبیه الصعیدی |
| ٣ - حكاية عروسة البحر | (شعر) | حجاج البای |
| ٤ - الدم ٠٠ وشجرة التوت
الأحمر « القبو » | (رواية) | محمد عبد الله عيسى |
| ٥ - وقائع دوت الجياد | (شعر) | عصام الفايز |
| ٦ - الشاطر حسن يخيب | (قصص) | عبد المنعم الباز |
| ٧ - ٠٠ وعائد اليك | (شعر) | المنجى سرحان |

العدد القادم : قصاصات حب (قصص)

اسماعيل على

تطلب كتب هذه السلسلة من :

- ① باعة الصحف
- ② مكتبات الهيئة
- ③ المعرض الدائم للكتاب بمقر الهيئة
- ④ مكتبات الهيئة المنتقلة بالأحياء والأقاليم
- ⑤ منافذ التوزيع في مقار وفروع الثقافة الجماهيرية وهي كما يلي :
 - الوادى الجديد ٠٠ الداخلة والخارجة
 - البجيرة
 - المنيا
 - سوهاج
 - بورسعيد
 - دهياط
 - فارسكور
 - القليوبية (بنها)

ففي أعدادنا القادمة

تاريخ يؤورقه الظما	شهور فواز	د. أنس داود
بقايا انتظار	عبد الفتاح منصور	د. عبد القادر القط
اعدام قيس بن الملوح	محمد عبد العزيز شنب	د. فتوح أحمد
نقوش الدم	رجب سعد السيد	أ. محمد السيد عيد
تأملات في وجه ملائكي	عبد الله السيد شرف	د. يسرى العزب
الصعود الى القصر	مصطفى الأسمر	أ. سامي خشبة
اغتراب	ناجي عبد اللطيف	د. أحمد درويش
... والفجر	جمال نجيب التلاوي	د. محمود الحسيني
فيضا يكون العشق	عبد المجيد أحمد	أ. محمد ابراهيم أبو سنه
حكاية الديب رماح	خبري عبد الجواد	أ. ادوار الخراط
خديجة بنت	السماح عبد الله	أ. فريدة النقاش
الضحى الواسع		
فارس آخر زمن	حسن شلنده	أ. مراد عبد الرحمن مبروك

مطابع الهيئة المصرية العامة للكتاب

رقم الايداع بدار الكتب ١٩٨٧/٣٨٤٨

ISBN ٥ - ١٣٧٣ - ٠١ - ٩٧٧